

西事江略

一
八
函
冊

西事彙略卷二

迤西陸防各軍總司令部編輯

永昌之變

火急永昌由守王大隊長黃李宋各管帶同鑒風聞騰越散勇到永有煽惑各營兵丁情事在騰遣散時既頒光復功章以紀其勞復發回鄉盤費以示體恤待遇不爲不優乃該散兵等不知自愛至永散謠惑衆非嚴行查拏爲首造謠之徒從重懲治殊不足以定軍心而消民患應由該守會同王大隊長及各管帶嚴密查拏到案訊明分別輕重嚴行懲辦黃李宋各營業已分定衛戍地點應遵前飭廣續開拔來騰發清薪餉各赴防地勿事稽延其各營兵勇來騰旅費昨據電稱已經借支無慮缺乏各營何日起程仍先電明爲盼總司令李協都督張眞印

省城軍都督府鈞鑒頃接永昌由守雲龍王大隊長太潛眞電稱近因有本地土匪及騰越散兵到永聳動各營謠惑繁興兼因第六營文案陳子清在永康有財物曖昧之事致昨晚該營兵勾結各營與陳爲難聲勢洶洶幾成事變本日宋營出發行抵南城

爲所部及第六營兵截住開放數槍聲言須清餉後始准行否則開槍等語跡近恐嚇要挾宋卽調兵回營旋邀齊在府署公議慮民驚擾由府暫借宋營壹仟貳百兩李營昨借叁百今再借伍百兩黃營玖百兩共銀貳仟玖百兩暫紓眉急現六營甫行三營不服命令勾串煽動且夕將成鉅變我軍勢孤慮難維持乞速示辦法當卽密電由守王大隊長文曰騰越散兵到永造謠煽惑搖動兵心以致六營兵勾結各營始與陳文案爲難繼復伙同三營向宋管帶索餉跡其情形似六營首先發難其受惑者必多今宋黃李三營既由府墊借餉銀貳仟玖百兩六營行而三營又復止而不行其違抗爲尤甚十一營未經提及想黃管帶尙能約束然亦未有不暗通聲氣者現該大隊率兩中隊駐永數雖較單兵精器利制之有餘惟遽予剿辦恐牽大局且害治安愚意現在宜分兩層六營已行十一營未動不服命令者祇宋營耳若一二日中黃營繼行則宋營尤孤再不行則由該大隊長乘早晚不意率兵掩入該營勒令繳槍解散一面驅逐游勇一面嚴守各城已散之兵無械不足慮在途之兵知有備亦必不敢回想可無事

此一層也若黃營宋營均不肯行須密察是否官弁主使抑係日兵違抗官弁號令不行若官弁無心則會同黃宋齊集各兵切實開導曉以利害令其速赴騰越住紮祇須有多數服從少數不遵僅可拿辦若官弁有心則暫勿擅動一面驅逐游勇以杜勾結一面陰勒軍隊以備不虞一面由密電飛報以便分撥接應誘於隙地聚而殲之罪亦應得此又一層也總之事機萬變不能執一務須靜察默應毋激毋惹至要至囑仍將辦理查察情形隨時密報等去訖辦理情形如何再爲續陳師長根源叩眞印

急省城軍都督府鈞鑒永昌兵匪勾結煽動及密指示辦法各情昨經具電陳明旋於昨晚十二句鐘以後查得永昌電局無人管理今晨始通詢據該局報生電稱昨夜十二句鐘叛勇等起事焚毀城內三牌路附近四十餘家至今日早七句鐘槍聲始息火勢漸減電局亦經被搶由守無恙該生事後回局檢查電機幸未毀壞等語繼自本日上午前十一點鐘至午後七點鐘該局又復無人接收電報由機呼喚迄無應者幸機門直開來往各電得以通過由守王大隊長亦無電來不識是何情形誠恐匪亂又熾查

現在駐永陸軍僅王太潛之兩隊騰事甫就範近復形恐慌兵力亦難遽分刻已電飭孫聯長飛飭嚴衍恒速帶駐紮漾濞之兩隊剋日開拔赴永聽王大隊長指揮漾濞地方派李中隊長鐘翰率領該中隊開往填紮以爲後援藩所統國民軍第十營飭該營管帶趙勳泰率領赴永於明日起程並電飭永平李令治鄭中隊長則嚴行防堵無任竄擾去後永康一面已有徐教練官鴻恩率隊前往兜剿防禦均可無虞謹此電陳乞紓廑念藩根源叩文印

省城軍都督府鈞鑒頃據由守雲龍王大隊長太潛尤電稱三六兩營午間鬧餉業已電陳茲探悉實第六營兵勾串而起現雖開出兩隊尙餘一隊潛伏夥同騰來散兵謀今夜起事以口令爲連絡現已嚴加戒備並由馬宋黃三君分頭約束所部馬宋擬後日出發並聞旋據王大隊長文電稱眞日二更後駐永防軍第六營反亂燒搶永城匪勢太甚我軍力薄請速派兵星夜到永援應復據管帶張定甲警局長丁上達電稱昨夜永城內兵營忽變將城內居民財物全數掠搶尙焚燒街面鋪戶數拾所如何處置

請速示復各等語當即會同張鎮文光電飭一面由該守等飛速撲滅嚴密防維無任蔓延一面已由騰榆分撥軍隊兼程赴永協同搜剿並將起事詳情迅速電復去訖謹陳根源叩文印

省城軍都督府鈞鑒本日午前接永昌由守元電稱十一日兵匪裹串入城潛伏夥同騰來散勇及匪二千餘是夜二更起事槍聲自南門街來旋即全城震動火光亂發通宵達旦舖家共焚一百二三十家除赤貧外無不被掠一空知府衛兵四十名僅能保護署藏軍火幸匪鎗係向空擊尙未傷人積穀保惠各倉及府署存銀均有損失各軍旋出救火天明始定刻正撫恤災黎調查損失知府忝任地方不能先事挽救以致誤國誤民愧悚曷極現匪黨尙伏附近當會同第二大隊及第十一營分頭嚴拿懲辦並由電機詢問永局報生據稱現在城內有由守王大隊長馬宋黃湯邵張各管帶等彈壓李光斗所帶兵丁於十一日出發又復竄回有云兵燹回時李光斗不見者張定甲現尙在永黃住財神廟宋住川主廟王住學宮所燒舖戶民房約百四十家以三四牌

路爲最多同豐街次之通商巷又次之各大號多搶掠一空福順店並被燒去店內鹽線貨物盡係本地無賴抬去火起係從三牌坊至朱子街又對面從通商巷至北門街對面處放火不知何人是時由守在署宋馬已避起事時適當府署放二更炮隨聞街中槍聲繼起又自川主廟內連放數十槍並聞係以獨立二字爲號十二日早火熄亂定各官長即行搜拏叛匪清查財物遇有拏包袱者均即查問叛勇搶後多逃出城現街上擊斃七八名並正法一名城內漸形安靜各等語謹陳師長根源叩元印

省城軍都督府鈞鑒昨晚午後九句鐘接由守王大隊長黃鑑鋒湯顯伯宋學詩邵華軒馬登雲文電稱十一日晚防軍第六營燒搶軍民驚惶街市掩蔽十二日早復蔓回永城會同各軍兜緝至午已全數擊散奪獲槍彈多件等語當即會同趙巡按張鎮電復文曰元電悉此次叛勇焚搶協力兜拿全數擊散辦理尙爲迅速現在雖經擊散竄匿竄擾在在可虞務須嚴拿首要解散脅從一面撥派軍隊分投跟踪搜剿餘匪迅速殄除以謝地方一面飛飭防團嚴紮要隘防範詰查如敢抗拒即行格殺以防竄擾勿

稍鬆懈是爲至要此次變生不測地方受害實深憫惻究竟民間被焚被搶者各若干家應卽由府詳晰查明妥爲撫綏以免失所仍將肇亂詳情善後辦法從速電覆切盼等語併錄呈鑒師長根源叩元印

省城軍都督府鈞鑒頃據永昌原歸黃鑑鋒所統之第四營管帶湯顯伯盧海廷等專稟稱十一日夜第六營李光斗帶兵作亂并放火燒拍懇請救兵趕緊整隊前來等語當經會同張鎮文光電飭由守王大隊長及黃鑑鋒馬登雲宋學詩湯顯伯文曰李光斗此次反正並無殊功到騰之初卽委充幫帶待遇不爲不優此在稍具天良者宜如何力圖報稱乃胆敢率兵倡亂肆行燒搶狼子野心爲之髮指騰永各軍前因招募太濫紀律不嚴大被惡聲幾於無以自白幸得李師長力爲湔雪我將士爭自濯礪騰永各軍名譽始有此表白之一日該叛首李光斗倡亂焚搶躬爲盜賊之行若不協力迅將叛該首李光斗立予擒斬並將該部下作亂之叛勇悉數殲除不但無以謝地方無以對軍府卽我軍之污點亦無自而湔除電到希卽遵照辦理毋使倡亂之徒得以漏

網是所切盼等語合錄呈鑒師長根源叩元印

懸賞緝拿宋學詩李光斗示

爲懸賞緝拿事照得前國民軍第三營管帶宋學詩第六營管帶李光斗前在反正之際率帶軍隊並無表率本師長到永之時姑念其曾經隨同張協都督在事出力免其前愆勛以忠義并於裁併編制各營後分派宋學詩爲西防十二營管帶李光斗爲十一營幫帶以策將來方冀其感待遇之恩必力圖桑榆之蓋乃此次永昌游民散勇勾結燒搶宋營兵丁尙知利害有多數不爲所動而該管帶宋學詩於臨事之際始則伙同逼餉繼則棄軍潛逃形跡既屬可疑地方實爲貽誤衡情論罪絕無可追李營兵丁已經出發該幫帶李光斗竟倡謀爲亂率隊撲回府城首先放槍驚衆乘夜縱火大肆搶劫塗炭生民敗壞軍紀尤屬罪不容誅除六營從逸兵丁已飭分投搜捕追拿獲即就地正法並通飭文武嚴緝該在逃管帶幫帶不使有一人漏網外合行懸賞曉諭爲此示仰各屬軍民團保諸色人等一體知悉如有將該逃管帶宋學詩幫帶李光斗拿

獲捆送行轅或永昌府署及各地方官者獲一人賞銀五百元兩人並獲賞銀壹千元
驗明即行核發查宋學詩稱楚雄縣人年約二十五六歲原在榆標充當正目身材強
幹面紫色無鬚李光斗係昆明縣人年約三十二三歲面紫黑色寡瘦無鬚合併示知
特示

省城軍都督府鈞鑒本日午後接永昌由守王大隊長黃鑑鋒馬登雲邵華軒等元電
稱真日永城燒搶竟夕幸未傷人天明始定然餘匪尙伏文日復有蠢動之勢當會派
兵隊把守各城嚴密搜查並勒繳第六營槍械擊斃抗傲官弁四人正法獲贓劫匪數
人是夕得免無事本日居民來報窩贓匪類多冢復派隊嚴查清出贓物交自治公所
收存分別取保具領並酌散積穀以資賑恤其實在搶劫之匪仍卽就地正法以儆其
餘宋管帶似有爲難情形于真夜離城李光斗于是晚出走均不知去向張定甲現在
城內尙無別故因第三營無主署府從權照會馬君兼管第三營事囑卽遵電率領全
隊開拔赴騰乞卽會電飭知現城鄉散勇游民到處潛伏人心未安公私儲蓄一空百

政無從措手瘡痍滿目仰思無計除仍督飭嚴密稽查驅逐並隨時撫綏外謹懇師長
速駕否則恐難收拾等語當即會同張鎮電覆文曰守城查匪勒繳六營槍械擊斃抗
拒官弁正法得贓劫匪辦理均是居民所報窩贓窩匪多家其窩藏各戶既經清出贓
物應即查訊明確就地正法以昭炯戒在場行劫各匪及六營叛兵亦即派兵分投搜
捕追拿獲卽正法毋使一人漏網李光斗爲首倡亂宋學詩臨事脫逃其罪均不容誅
更須上緊緝明正典刑此事非願多事殺戮實非此無以謝地方而恢復軍人名譽
也城鄉散勇游民如在場者拿獲仍予正法其不在場者仍隨時督飭兵團認真稽查
驅逐被難良民已酌散積穀尤須妥爲撫綏勿使流離失所至囑本師長現已整理一
切不日卽躬率大隊到永督辦善後事宜趙管已開拔此復等語謹錄呈鑒師長根源
叩寒印

永昌黃君鑑鋒馬君傑三邵君華軒同鑒此次永城散勇游民勾結六營爲變第三營
弁兵屹然不動足見深明大義本擬飭由傑三兼帶該營開拔來騰繼思騰城駐兵尙

多該營到此無從安頓希卽察看情形如能解散卽集合演說令將槍枝子彈全數呈繳算清前餉每名酌給差盤銀貳兩分遣回籍需銀若干向由太守處借發開報得力哨弁開單送部錄用如實難於措手則仍由傑三尅日率帶來騰盼先酌復根源文光元印

省城軍都督府鈞鑒永昌叛勇滋亂及布置一切情形節經電陳在案惟此次裁撤各營前者通盤籌劃騰永兩處以騰中駐紮軍隊爲最多入手之初自必先將騰軍分別解散然後可調永軍入騰逆知永軍調回難保不無波折故雖在兵力難分之際猶留王太潛率兵兩隊駐紮又以控馭永軍責之彭莫迨至彭莫遭變深慮統率無人故一面趕將騰軍遣散一面卽調永軍來騰又經由永厚支薪餉以安其心其李光斗所帶之第六營知其難信電飭首先開拔亦因有黃鑑鋒營藉以牽掣王太潛兩隊資之鎮懾但能開出永城卽不患其難制不意已經出發中途又復蹇回煽亂燒搶實非初料所及此次地方受害皆源計慮未周深切疚負應請嚴加議處現在懲前毖後騰事益

宜慎圖來騰陸軍現止一營及一中隊用備調遣之資難作衛戍之用迨將來隨同出發恐騰軍亦不足恃方今餉項奇絀添練又虞不給叛管李光斗一營本在裁撤之列擬將逃管宋學詩一營亦全數解散徵募本地土著改練陸軍兩中隊以資鎮壓而備不虞該隊擬設督隊官一員駐紮騰城官長均用帶騰可靠之員薪餉卽以解散之宋營撥給核計尙無出入國民軍薛朗之第十五營原擬駐騰並定以騰越縣屬境爲衛戍地現宋學詩既逃擬將該營改紮南甸等處以第十二營衛戍地段爲該營衛戍地庶餉糈可節防範有資是否伏候核示遵行師長根源叩寒印

騰越李師長鑒寒電悉李宋兩營野性難馴尙非措置失當台端引咎自責足徵謙抑所請嚴處之處應毋庸議薛營改紮南甸及將裁撤宋營薪餉徵募土著改練陸軍兩中隊駐騰均屬可行騰永防務悉聽主持不爲遙制也都督府銑印

永昌由太守黃馬邵各管帶王大隊長覽宋學詩所帶之第三營現願繳槍解散其月餉及恩餉自應核算發給查該營自舊歷九月十一成軍日起至十月底止計一月零

二十日全營官兵共應領銀叁千貳百玖拾陸兩貳錢伍分伍厘自十一月初一日起曾經通飭每哨汰去二棚扣至十二月初六日止計一月零六天全營共應領銀壹仟玖百伍拾兩零貳錢柒分以上每兵月餉均以陸兩算自十二月初七日至月底止計二十四日著照防營餉章算全營共應領銀捌百肆拾肆兩肆錢壹分此次遣散每兵應給恩餉銀貳兩共合銀肆百伍拾陸兩總共應領銀陸千伍百零陸兩玖錢叁分伍厘除宋邵二管帶九十兩月由騰領去叁仟伍百零叁兩柒錢並在永由財政局取過銀叁千叁百兩共合領去銀柒千捌百零叁兩柒錢外合多領銀壹千零玖拾陸兩柒錢陸分伍厘其向由守所借之數尙不在內至李光斗所帶之第六營此次叛亂係該營倡首其恩餉及叛亂以後六日之餉共應扣銀陸百捌拾陸兩貳錢玖分貳厘該營實共應領銀伍千捌百貳拾兩零陸錢肆分叁厘除李光斗在騰領去銀肆千肆百肆拾捌兩肆錢並在永由財政局取過銀叁千貳百兩共合領去銀柒千陸百肆拾捌兩肆錢外合多領壹仟捌百貳拾柒兩柒錢伍分柒厘其向由守借領之款亦不在內但

李光斗長領之款概應嚴行追繳宋學詩營長領之款自應查明分別追繳不能格外再發總以先將該營槍械繳收清楚爲要着希卽會同妥商辦理並將辦理情形隨時詳報根源文光刪印

省城軍都督府鈞鑒頃接永昌由守雲龍黃鑑鋒馬登雲刪電稱本日第三營願遵電繳械解散經署府派員點名收取槍械并借撥雲井鹽課存銀貳仟兩每名給川資銀五兩各官弁日兵共給銀貳仟兩其餉是否長支登雲擔任赴騰結算點收各種槍枝二百捌拾伍桿子彈壹萬四千陸百餘顆給與路票督令卽日離永該營官長亦由登雲尅日偕同赴騰現匪黨竄走已飛札分飭各鄉嚴密緝拏如遇持槍拒捕者准其格殺無論並電鄰境嚴加防堵惟市井荒涼人皆菜色賊心狼毒一至於斯我民何辜言之慘惻涕泣以聞等語謹陳根源叩鈇印

永平鄭中隊長李令覽鄭電悉該隊小隊長得報趕赴滄江拿獲劫匪九人并刀馬銀物多件足見緝捕認真所獲匪徒卽會同訊明就地正法并出示宣布罪狀贓物點明

件數開單送交永昌府示諭失主分別認領前開往滄江一小隊卽飭留駐以資查緝毋使叛勇游匪一人脫逃至囑總司令部寒印

曲硯鄭中隊長李令覽鄭電悉張祠樑前隸劉竹雲部下充先鋒第一營管帶軍無紀律搶劫橫行始則率隊向彭莫鬧餉不服命令幾傷統將繼派往永康剿辦刀上達行同盜賊所過一空後復敢於裁撤之後前往永昌散布謠言勾結李光斗焚搶永城公私罄淨惡跡昭著不可勝紀今被該隊拿獲應卽迅速正法梟示以昭炯戒該先鋒營幫帶唐明臣前次鬧餉助紂爲虐此次同行爲虎添翼實屬同惡相濟罪不容誅應卽一併正法前頒命令曾聲明緝獲張祠樑者賞銀伍百元應卽由李令撥欵先行墊發查該中隊係三小隊賞銀應分四份分給獲犯之一小隊得二份未獲犯之二小隊各得一份以資獎勵而示平均該犯前曾請有護照所有馬匹什物應全數緝獲會同切實清釐變價充作永平縣學費開單報查並遵照電文出示宣布罪狀咸使聞知唐瑒同行仍宜妥爲保護總司令部鈇印

加急永平李令鄭中隊長覽張祠樑在永煽亂居民迭遭塗毒言之髮指銑電已飭將該匪及唐明臣并隨從人等一體正法冀可稍謝地方而快人心何以任意稽延並聽其電求騰衝趙守爲之邀免殊屬玩視電到應卽遵照前電立予正法勿稍遲延仍迅電覆根源篠印

省城軍都督府鈞鑒頃接永平李令鄭中隊長養電稱何煦清已遵諭正法李學反覆質訊據稱爲何之馬夫騾物係何所有情尙屬實從寬擬監禁半年潘玉清乃唐璆長隨煙物屬實但無搶劫等情擬監禁二年是否有當請電示等語當卽電復文曰李學訊係何之馬夫應卽開釋潘玉清私帶煙土旣係唐璆長隨實屬知法犯法所擬監禁二年尙不足以蔽其辜着改爲監禁三年並將收禁日期通報查考何熙清旣已正法騾物洋煙仍照前電辦理等語合併錄呈乞查核飭部備案師長根源叩濛印大理秦知府覽支電悉逃匪郭玉清旣經供認在永掠搶不諱著卽立予正法搜獲各物卽行變價並銀九十餘兩除提十兩交陳大隊作爲獎給捕獲該犯各兵外其餘一

概撥爲三公祠經費會票銷燬希卽照辦此復總司令部印

省城軍都督府鈞鑒頃接永昌由守電稱昨奉密電拏辦匪首劉光輝正密飭嚴緝間旋有眞日之變嗣探悉該匪與其弟劉漢城於眞夜放火搶掠後携贓竄伏金鷄村思欲再逞當飛速密札區長王德培楊子臣王興等率團兵前往密拿該匪復敢與其弟劉漢城拒傷團丁當由該區長等懸賞叁百兩將渠弟兄格殺解請驗明前來署府覆查屬實將其梟首示衆並又由府緝獲搶匪九名訊係搶劫匪不諱亦於本日正法人心大快當即電復文曰巧電悉匪首劉光輝弟兄既已梟示稍洩衆憤惟窩匪窩贓之戶其罪不減於匪並應查拿正法尤須速行清鄉之法以清亂源而弔後患至拿獲李光斗所部叛勇及本地大小土匪如果証據確鑿著卽立予斬決當此亂餘不能不用重典也嚴督隊官所率兩中隊今晨已由永平開拔并聞等語除譯發外合併電陳師長根源謹叩效印

永昌嚴督隊官覽來電悉永郡此次之亂實係內匪勾結外匪而起故驅除外匪爲清

亂之本而搜查內匪尤當務之急該隊官請以所部逡巡四郊籌畫甚是應卽就近稟承王大隊長商承由守分別派遣妥慎辦理並將辦理情形隨時稟報可也此復總司令部馬印

騰越師長憲鈞鑒恒奉王大隊長命令已派出二小隊巡緝雲龍一小隊巡緝由望均已出發黃營昨日已遣散三哨槍均存府永民雖稍安靖而散勇滿城民多恐懼若不速籌良法後患堪虞恒默查永情若憲麾能早臨一日則早安靖一日是否有當伏乞鈞誨受業衍恒叩

省城軍都督府鈞鑒頃接永昌由守電稱趙管帶於三十日到現與王黃各營會商先行派兵分路清鄉搜拏餘匪本日出發昨由署府正法要匪十一名俟鄉間靜謐跟卽再清城市等語謹陳師長根源叩號印

省城軍都督府鈞鑒頃接趙管帶動泰篠電稱泰營篠午抵永遵紮縣署查看永情慘莫可言而匪已逃散四處潛匿應如何捕拿當與由府王大隊長妥議辦法俟商定再

爲稟聞再奏在途先後拿獲逃匪楊子安等五名并獲槍刀脏物數件訊據供認不諱當遵臨行而諭立即就地正法脏物候彙報呈繳併聞等語謹陳師長根源叩號印趙懌老李師長鑒號馮弼電悉趙營到永卽令協同由守辦理清鄉以清餘孽李營給餉遣散甚善都督府敬印

省城軍都督府鈞鑒源於馬日會同張鎮電飭永昌由守雲龍黃管帶鑑峯將該管所部一營零一哨按名點驗收繳槍械後卽算清餉項應否補發若干外每兵發給恩餉銀貳兩令其遣散回里由府發給路票該管暨湯邵兩幫帶卽來騰聽候委用去訖漾據由守電稱奉馬電當與黃管帶面商自應遵電遣散惟核計欠餉需叁千肆百兩合恩餉計之共需肆千餘金署府竭力借湊只得壹千餘兩公私匱竭無從籌措應請速由騰運永並隨寄光復功章三百餘個以資配發等語當卽電復文曰漾電悉黃營餉項自九月初八起至臘月初七止一營零一哨卽照騰軍所定餉項計算共三月不過約需銀捌千兩又自臘月初八起至本月電飭解散日止約一箇月照防營餉章核算

需餉銀壹千捌百餘拾兩二共及各項雜費亦不過玖千多金又每兵各給恩餉貳兩所需亦僅陸柒捌百金統計約需銀壹萬壹千兩左右查該管在騰在永在永平暨由該守處已共領過銀玖千肆百伍拾兩以應支應放各數相較似已足以相抵但念該管反正之際尙資得力不能不稍事優異所有前領之玖千肆百伍拾兩概作爲臘月初七以前餉項及獎賞并各項雜費自初八日起至解散日止特別准照一箇月按防營章制算給其恩餉仍照騰中遣散例每兵給銀貳兩不得破例多予希卽轉知黃管帶卽日將全數所有軍裝槍械子彈全數交清後卽行核發功章惟須詳查果係在光復時初六七八三日以內出力者方能發給按名開單具報不得濫予再查一月餉項及恩餉約需貳千金該守旣籌有千餘不敷之數希向商號暫挪明日卽匯還特復並電黃鑑鋒文曰該營編爲第十一營已定衛戍地點查係烟瘴之區轉瞬卽發因慮該營兵勇概係客籍斷難耐瘴特將該營就永解散俟該管來騰另招土著率赴所定防地其該管迭次支領共銀玖千肆百伍拾兩概作爲臘月初七以前餉項及各項開支

尙有不敷之數來騰再爲算結現准在永暫領貳千兩作爲臘月初八日起至解散日止一箇月薪餉照防營餉章核計下餘卽爲解散恩餉該營所有軍裝槍械子彈務須全數點交由守迅速來騰以便面商一切勿延等語謹錄呈鑒師長根源謹叩敬印

省城軍都督府鈞鑒敬日據永昌由守王大隊長趙管帶勳泰電稱遵漾敬兩電已由署府向李趙借銀千伍百兩湊足貳千發交黃管帶散放即日點收槍枝一百六十三桿筆碼五千五百餘顆號衣二十七件前派出清鄉三棚尅日撤回再繳一俟功章到永卽並路票發領遣令回籍惟湯帮帶已前赴龍陵率兵十名槍九桿應逕電飭知宋營已悉數出境矣當卽會同張鎮電復文曰黃管帶所部係一營零一哨槍枝約計三百二十桿現在該營旣已解散何以僅繳一百六十三桿卽併清鄉之三棚及湯帮帶赴龍所携帶者計之尙少一百一十餘桿希卽詢問黃管此項槍枝何以缺少至如是之多飭其按數速繳並復爲盼功章執照已專人送永宥日可到等語本日復據有電稱黃管帶面稱該營前併之李慶堂壹哨原無槍械所領者實只此數騰越有冊領可

稽不日到騰面稟俟清鄉撤回亦即照繳清楚等情本日該管續繳子彈貳拾箱衣褲各壹百餘套謹並陳明等語謹錄呈鑒師長根源謹叩宥印

永昌由太守王大隊長趙管帶嚴督隊官覽黃營功章執照前於馮日起解本日計可抵永解到後應即遵照前電所開辦法按名頒給勿稍冗濫務於本日內頒發清楚即行遣散回籍限明日一律出境第三日即分派官長清查棧房客寓茶館酒館平民人戶如有逗遛不行者即予嚴拿斬決一面出示曉諭地方人等不得窩留致干同坐騰中解散兵勇即係此項辦法是以前後解散近二千人從未稍滋事端現該府地方懲前毖後尤應查照辦理勿稍疎懈是爲至要仍將辦理情形尅日電復爲盼聲電已悉約數日內將騰事布置妥善即行赴永並復總司令部宥印

永昌趙管帶覽盈密頃據施中隊長面稱永昌散勇尙未出境匪棍尤多深爲可慮等語查前次永亂即係兵匪勾結爲患現在黃營解散勒限三日內一律出境曾經電飭在案茲特派該管帶專任巡查之責所有城廂附近務即分派弁兵嚴密巡視如有散

勇逗留不行潛圖肇事及本處外來之匪應即嚴拿就地正法以清亂原而靖地方無稍寬縱至要總司令部印

永昌由太守覽永郡茶舖查有五十餘家宵小潛藏奸宄溷迹實爲盜賊淵藪營此業者率爲哥老會中之人聲氣相通貽害地方誠非淺鮮希卽出示封禁只酌留四五戶須擇有身家而善良者並由自治局紳出結妥保始准開設其舖內不准容納匪類仍派巡警隨時偵察此亦弭盜之一法也希迅速辦理爲盼總司令部元印

永昌由太守王大隊長嚴督隊官鑒騰中一切事宜漸已就緒源約於初四由騰啟程赴永又查永昌地方現漸安謐駐兵太多難於供億源不日抵永所帶軍隊尤衆深虞擁擠難容嚴督隊官所率之兩隊卽着於陽歷三月初一日開拔回榆王大隊長所率之兩隊着於初四日開回各該隊日兵每名獎賞銀壹兩由守處照發輸運輜重馬疋並由府辦理再此次各隊官長目兵徵調往來捕匪保安勤勞備至軫念實深應由該大隊督長隊官等代爲慰勞王大隊長及嚴督隊官所部之兩隊及趙管帶之一營

並犒牛一條以示嘉獎仍將開拔日期報查根源感印

省城軍都督府鈞鑒昨據永昌自治局紳趙端等聯名稟稱此次永昌變亂事後細查原因雖自第六營發起第三四營亦同聲相助三營管帶宋學詩卽宋寶奎平時爲人尙屬誠樸四營管帶黃鑑鋒弄弄劇爲生比睚匪類此次所部駐紮南城內財神廟該營幫帶湯顯伯分紮寶豐店是夜難作始自該營迨至清查失物該兩處附近居民俱聞焚燒綢緞布疋臭味嗣後查知該兩處焚燬渣滓概埋地內現在黃已調騰湯赴龍陵若得除此渠魁庶永郡紳民少伸怨憤等情密稟前來并據派去偵查員林景新等報同前情查宋寶奎經藩等調查委因事起倉卒無法禁止愧懼交集投河遇救前經電陳鈞府奉准宥免在案昨日該逃管已到騰自首黃鑑鋒亦旋踵至當經會同質訊永事宋則據理以陳黃則無詞以對其罪狀已昭然在目若不亟伸顯戮實無以謝永民當由文光於本日將黃鑑鋒宣布罪狀立予正法宋寶奎查其心實無他此次獲咎係爲黃鑑鋒所累亦經藩源等宣示鈞府德意令其盡心効力以贖前愆謹電陳明並

懇飭部備案藩根源文光叩虞印

批永昌府由守轉呈保山縣自治公所稟被難情形文

批文悉據呈該公所稟稱各情閱之實堪痛忿此次永軍未變之先在騰勞心焦思迭飭散餉調騰并節節設防并非料不及此即騰中兵勇解散之初亦經電飭沿途地方官吏軍隊於經過要隘嚴行盤查據稱有騰越散勇三四百陸續由龍泉門入到太保山寺廟所紮各營鼓吹起事竟不之備倏於是晚難作竟夜焚搶致被禍一百五十餘家之多繁盛頓成焦土言念斯難無淚可揮惟屢電詢糜爛各情并飭加意賑恤妥籌善後辦法據復均未如來牘之甚我輩忝盡地方之責防範未周負疚已大事後始籌補救何可再事因循仰該府迅即調查受難人民分別輕重速加賑撫以免流離失所其已逃在場燒搶勇匪仍應遵照迭次電飭嚴行搜索獲案即行正法以謝地方除轉陳軍都督府外仰即遵照并錄批轉行自治公所查照摘由批

楚雄局轉送景東林同知覽永郡此次之變叛亂者係住永之永營勾結者係在永之

土匪騰之散勇又復混迹其間張祠樑唐明臣煽惑於前黃鑑鋒李光斗主動於後焚掠民房至百三十餘家宋學詩畏懼潛逃所部兵勇皆變爲匪源聞警後當即派兵助勦復電沿途嚴密緝拿各處擒斬叛匪一百二三十名清獲槍彈銀物多件匪首張祠樑唐明臣黃鑑鋒亦先後拿獲正法惟李光斗尙未就獲正飭懸賞緝宋學詩事後自首疊查永事初起該逃管情急投河經衆援救得免其罪雖追其情可矜復經永紳等屢電力請寬宥已准如所請貸其一死仍飭効力行伍贖罪現在亂事雖平而元氣大傷未事之先防範未周實深疚負被難人民已電飭由守撫慰安集勿使蕩析離居並飭清鄉以除餘黨騰事就範源不日卽至永郡籌辦善後事定然後旋榆期有以對我父老子弟也特復根源灰印

永昌由太守轉自治局紳暨闔郡父老兄弟鑒寒電悉永郡自經匪亂元氣大傷救濟匪易本擬早日蒞永與諸君共謀善後之方惟騰地內控諸夷外連英緬一舉一措影響大局而至騰迄今內外交困心力俱殫晝夜籌維未安寢息現雖內務就理而邊防

要件猶須整飭布置大定卽行起程實凜皮存毛傅之喻敢有厚彼薄此之心此中緩急必蒙共諒至源未到永前一切撫卹事宜仍希各局紳查照歷次文電商承永昌府先行籌辦趙管帶紀律嚴明應如所請留永防守劉管一營俟該管到永卽飭其統率全部前赴永康填紮特復根源寒印

騰越李師長鈞鑒趙大隊長到永辦事公允兵亦能遵規則紳民稍安請暫留永防守劉管一營祈並調他往文前蒙鈞諭永郡一切善後事宜必爲布置妥善紳民望公如望雲霓懇發駕速來極力救濟庶厚騰薄永之疑亦渙然冰釋矣保山自治局紳暨人民叩寒印

省城軍都督府鈞鑒號電敬悉現駐永城國民軍第十營自管帶以至目兵均趙巡按所選募且係劍麗等處土著各有身家此次在永甚守紀律訪緝盜匪尤爲得力曾經該府自治局紳電請留永當卽照准國民軍十七營又飭其全部駐紮永康一郡之地共有兩營足資鎮攝所請挑選土著兩大隊之處似可勿庸置議至此次被難人民源

屢電由守及自治局紳妥籌撫恤之方以免失所並行清鄉之法以靖亂源現均次第辦理所請提款數萬賑濟之處擬俟源到永後再爲斟酌請示核辦謹復師長根源叩
馬印

省城軍都督府鈞鑒月密永昌之亂前經派員密查証以地方密稟實由土匪勾結永軍聯合陸軍乃釀禍變惟慮遽行發布更至激生鉅變不可收拾因擬到永澈查情形再行請示辦理昨夕抵永面詢由守及公正士紳據稱此次主謀縱火係已正法之本
地匪首劉光輝管帶黃鑑鋒李光斗兩營兵丁全數在場宋寶奎營約六七十人陸軍
因而混同搶奪地方匪徒尤夥約在四千餘人甚至自治局議員地方巡警亦出而乘
機擄掠而婦人孺子且負扁擔肩布囊以從事有以甥劫舅家者有以壻劫岳家者有
以堂弟兄而相劫者人心奇變深駭聽聞由守所帶衛隊長何春芳教習段天福及各
兵丁均係大理自治機關兩部已撤之員兵到永後該隊教長習卽與會匪勾結是夜
事起派守前後門衛兵競向署內放槍該隊長等復危詞脅由守避出卽率衛兵入室

櫃毀將府署存銀以及衣被什物搶取一空倣擾之際由守亦不敢問迨趙管帶勦泰到永始勒令繳槍將該衛隊長教習及尤爲兇悍之衛兵九名先行監禁昨經提出訊明立予正法餘廿八名一並拘押派員會同由守嚴加鞫訊訊明分別辦理王太潛所部兵丁於天曉後始稍稍歸營羣議逃竄由守敦囑不可離城衆心始定由永開拔時捆載財物數十駄散勇同行者六七十人擬俟到榆後澈底查辦以伸軍紀昨午到後復會同官紳勘驗被焚舖戶共百一十一間拆毀者十間據稱確實調查此次鶴慶騰越四川各商幫損失約在八九萬永城舖戶居民合計被燬房屋被搶什物共約十二三萬總計約二十餘萬之譜目擊慘狀憫惻實深源坐味幾先尤多疚負勘後至自治局與局紳商辦善後大綱有三一嚴拿餘匪二飭造報確數妥議賑恤三整理地方政治各紳復堅留駐永一月籌畫諸務情詞迫切且有厚騰榆而薄永之怨源雖藉故辭謝環請益堅審察地方情形亦屬千瘡百孔不從根本整理機芽潛伏滋長可虞惟榆城當軍警衝突之後謠言四起刻雖稍平靜不能不防擬飭高級副官繆嘉壽與方大

隊長率帶兩中隊先於明日起程前往會同孫聯長秦守辦理一切以資防範而期接給繆嘉壽警敏精練西事深資臂助到榆如有緩急必能維持謹電陳明根源叩卅印省城軍政部鎔軒梓嚶惺甫三公鑒月密頃接毅廷電有新軍大隊長王太潛搶擄劫奪至今尙未懲辦云云查永昌土匪勾結永軍聯合陸軍各情迭電密陳想已入覽榆標皆係舊軍此行始隸源部到榆日擊弊習卽議援蜀或北伐爲之消納後因騰永反覆不能不借兵威然慮榆軍難恃僅調一營同往而鍾大隊甫與交綏感情甚惡陳松壽僅餘一隊舍王太潛一營別無可用且該營日兵十九皆係榆人大理反正之際各隊謀搶榆關實賴該營兵丁不允得免於難在榆標中最爲難得矣前初到永黃鑑鋒李光斗宋寶奎各軍屯聚永城設有不測前則牽動騰軍後則截斷榆援故酌留陸軍兩隊駐紮並屬彭莫防維一切擬抵禾木樹卽調宋寶奎抵騰再調李光斗黃鑑鋒陸續赴騰以備解散不意行抵禾木樹猝聞彭莫之變其時惟以能安輯爲幸最初計畫遂不能行此中艱難曲折當爲諸公所鑒及惟此次焚搶皆源防範未周何敢辭咎事

初電請嚴議又蒙軍府寬免疚負益深昨經親往察勘飭局調查造冊妥賑籌卹至在
場搶掠官兵自不容和事姑容致負地方特恐遽行發布必至激變愈難收拾因擬俟
退伍後再行澈查嚴辦此爲顧全大局非敢置之不問當亦爲諸公所諒近來日夜焦
灼專在於此先後去電推較可知毅廷來電箴告深感關愛惟榆城月來謠言蠱起一
日數驚又當各隊退伍之時軍警衝突之後大勢岌岌省電往來必由榆局通轉前事
明白宣布實恐風聲傳播關係甚大以後關於此事望用密電見示乞轉達毅廷爲禱
根源叩卅一印

省城軍都督府鈞鑒月密源抵永日當經會同張提台文光親往察勘被燬舖戶並飭
自治局紳將被焚被搶戶數造報去後茲據該紳等造冊由由守轉呈前來查此次變
亂損失固多然賑卹之施亦只能以貧困爲限况當公帑奇艱博濟尤屬不易惟念永
城遭此焚搶除殷實之戶受損未鉅者外貧民流離失所無以自存爲數亦復不少瘡
痍滿目深惻上仁擬懇籌撥賑卹銀肆伍萬兩發交官紳調查確數分別極貧次貧核

實散放以資拯濟而廣仁施可否之處伏候銜核施行根源叩江印

省城軍都督府鈞鑒昨奉佳電當即令永昌自治公所遵照議覆頃據覆稱永昌惟東河時虞潦決向歸農民分段修濬至於修路似可稍緩茲所急者在使貧民有業遊民得所而推廣習藝所尤爲當務之急鈞府恩頒賑欸壹萬金擬請專爲習藝所經費庶幾欸不虛糜民沾實惠但永昌自騰軍入永以來籌措軍餉至三四萬之多民力早已不支復加此次之變元氣大傷十室九空懇請轉電鈞府再給巨欸以廣仁施等情前來查該公所所請以賑濟之欸爲習藝所之費係爲惠濟貧民消納流氓起見應卽照准可否再沛恩施出自鈞裁再騰衝黃守處現存有張鎮移交欸及續收糧欸萬餘金尙須解省鈞府允給永賑一萬金擬卽由此欸項下如數提撥發交永昌自治公所收報以免周折而節運費如何乞電示飭遵師長根源叩篠印

李師長鑒篠電悉賑欸專爲習藝所經費惠及貧民甚善希卽轉飭該自治紳等安速籌辦黃守處既有存欸請卽飭提交收具報以省周折至該公所所請再發實難籌措

并希轉飭知照都督府政梗印

迤西鎮道統領聯長各協各府廳州縣暨自治公所鑒永昌此次匪變市肆焚燬財產損失以鉅萬計千瘡百孔十室九空目擊情形深堪憫惻源已電請軍府撥欸賑卹惟元氣大傷補救匪易擬再由迤西各屬官紳及巨商富戶募集多金以卹災黎諸公惠濟爲懷必蒙贊助電到請卽勸募無論多寡集有成數卽行匯永交永昌府散賑俾永民得免流離功德無量忝在同舟用是代請根源叩庚印

爲令知事照得永郡此次匪亂損失甚鉅居民流離尤堪憫惻當卽電請鈞府撥發巨欸賑濟並電迤西各屬文武官吏及自治公所集議捐助頃接各處來電樂輸者衆亟應設一收欸處以便兌收查永郡自治公所已設財政一科收欸處着卽附設該科凡有各屬官紳捐助之欸卽發交該科查收出具收執另欸存儲彙請辦理除令

永昌府自治公所

外爲此仰該

公所

府卽便遵照辦理此令右令永昌府知府由守暨永昌自治公所

雲南軍政部鑒據永昌由守暨永紳林景清等迭次面稱前謝守宇俊在省曾許捐公

益銀伍千兩現接楊君毅廷來電云此欸尙未收到永昌籌辦善後需欸正亟各屬官紳多任捐募以助賑贍謝守任永日久於義無辭欸經允許捐助尤非苛求擬請轉電核准將此欸撥充永昌善後經費並飭滙永應用等語是否可行祈查核示復根源叩
覈印

永昌李師長鑒霰電悉永紳謂謝字俊曾許捐銀伍千兩一案飭據民政司覆稱無案可稽第聞反正時有永紳多人強迫謝字俊親寫捐助永昌同鄉會公益事銀伍千兩字據旋經警局申斥息事并將勒捐字據追繳是此案已經取銷惟永昌此次兵變居民被害甚多情殊可憫該謝字俊任永日久誠如電文於義無辭擬飭令該員捐資助賑等情當即批由該司飭捐銀五千元俟繳到滙永應用都督府政有印

爲任用事照得地方自治實爲憲政之基其在滿清時代已具有端倪反正而後政成共和尤應力促進行况永昌經此次兵燹一切補救圖維休養生息應興應革各事宜次第待舉專賴地方衆望素孚具有能力之廉正士紳協力籌維庶免因循貽誤本總

司令官此次到永迭據官紳面陳自治公所組織未盡完善選舉多未適當僉請另行組織兼於公所職員參用委任法以專權責茲查有趙端堪以委充正議長聶肇緯堪以委充副議長林景清堪以委充議員兼學務科委員侯聯三堪以委充議員兼財政科委員劉炳蔚堪以委充議員兼文牘科委員陳進堪以委充議員兼實業科委員吳恒姚聯貴張紳楊毓銑何興楊正芳馬春鴻王浩馬殿元王朝清馮之賢褚美春歐文才田正福趙廷琛段宇澂段時銓鄭永熙李屬春張饑均堪委充議員惟聶肇緯劉炳蔚兩紳尙未到永其副議長暫由議員鄭永熙代理文牘科委員暫由張紳代理所有各議員任務即由正副議長會同地方官按照所設學務財政實業文牘四科分配任事并將辦事權責悉心規定至正副議長四科委員暨常駐議員監征員每月每員應支薪水若干亦由該正副議長會同地方官酌擬呈候核定凡以前之勸學所及各項學校并土民學堂各事宜均歸學務科籌畫經理凡以前之勸業所關於地方實業事宜均歸實業科籌畫經理凡地方財政除糧稅厘金等項仍歸印委徵收由自治公所

監督外其餘地方財政均歸財政科籌畫經理該公所一切文牘事宜均歸文牘科承辦所有各科委員承辦事務均悉秉承於正副議長以維秩序而免囂凌除呈報軍都督府暨咨令外爲此仰該員即便遵照悉心規畫妥爲辦理力圖進行以副厚望此狀右狀給永昌自治公所正議長趙端副議長聶肇緯議員兼學務科委員林景清議員兼財政科委員侯聯三議員兼文牘科委員劉炳蔚議員兼實業科委員陳進議員吳恒姚聯貴議員代理文牘科委員張紳楊毓銑何興楊正芳馬春鴻王浩馬殿元王朝清馮之賢褚萬春歐文才田正福趙廷琛段宇激段時銓議員代理副議長鄭永熙李屬春張巖右行永昌自治公所永昌府知府由守永昌商務分會

爲令知事案查永昌府由守單呈永昌學警自治公所歲入經費除黃慈錫箔捐銀及此次被燒舖戶地租外共計銀壹萬貳千零叁拾兩零壹錢伍分向歸該府徵收如壩租山租等項每因佃戶刁狡租息不能如數清完現在自治公所內設財政一科已委侯紳聯三充當該科委員所有舊管保惠倉祭租學租高等小學租息酒肉捐各管事

李文恩趙廷琛熊嘉善田法本董正周杜自順等一概取銷各將經手收支款目及各
種簿記造冊開單併交自治公所財政科委員點收即由該科委員併同以上各處經
費照案徵收支發核實報銷歷年佃戶所欠租息務宜嚴行追繳不准短少分厘以重
公帑至黃菸箔錫二項捐款年約合銀叁百餘兩亦宜照舊徵收易款存儲不得挪作
別用至被燒各舖房應卽籌款趕爲修建除令永昌府自治公所外爲此仰該公所即便遵照辦
理切切勿違此令計發抄摺

省城軍都督府秘書官楊毅廷君鑒永郡變亂以後元氣大傷庶政待理目前之救濟
源能勉任將來之維持責在地方永郡當事士紳多私而譎全無是非之公若付以任
務縱不至於債事終難信其熱心素聞聶君肇緯劉君炳蔚品學優裕公必審知現均
在省請轉告其迅速旋里贊助一切梓桑義務分所當盡何日起程仍希電復根源叩
省城軍都督府秘書處楊毅廷兄鑒微電誦悉源於永事疚負滋多欲圖補救之方端
賴扶維之力聶劉兩君願歸任事深慰鄙懷時事之壞卽由我地方人士無責任心兩

君共具熱忱不辭權責固源之所深求亦地方之所共賴屬迅速起程以資整理吳鄭何陳楊姚諸君從先曾以爲言復爲兄所深信已加委任仍望時賜箴規以資啟迪爲禱根源微印

省城軍都督府鈞鑒巡警之設本以詰奸禁暴保衛治安永昌原日巡警教練無素劣習甚深奸宄游惰亦皆溷迹其間前當永城匪亂竟至乘機搶奪現象至此可爲慨憤除已將搶擄各名拿案訊明正法外當與由守及各紳會商整飭之法擬將原日警長即行撤差另揀妥員接充將舊有巡警嚴行淘汰略做徵兵法由土著中審慎選募補足六千名認真訓練並略授以陸軍教練庶幾遇有匪警亦可期其捍衛茲查楊惠增堪以委任正警長包國本堪以委任副警長所有淘汰教練責成該員等悉心辦理除另文呈報外謹先電陳師長根源叩多印

省城巡警局吳局長鑒永郡巡警人類複雜素少教育此次匪亂該巡警等竟有乘亂搶掠情事源昨返永大加裁汰另募土著改辦地方警察隊並委楊惠增包國本爲正

副警長術科做陸軍教練學科仍照警章辦理昨由貴局委李樹藩到永查包國本勤慎明練且係永人現正力加整飭粗具規模未便遽易生手擬將包國本暫緩調省仍留原差李樹藩人頗誠篤騰正需人已委赴騰衝警察局矣特聞根源叩有叩

令案據

該守永昌府

呈稱湯判年收千數百兩舊額解四百兩現奉省文須全數提解並因地

方巡警及署內人役薪工五城女學需款補助指定此項撥補杯水車薪難以分應現在巡警款項籌定應請電轉財政司專留作補助書役薪工及女學之用奉覆後始能截留否則仍須照解等情據此本總司令官當電軍政部文曰案據永昌由守稟稱保山縣屬湯判每月約收銀百金舊額每年以四百兩解省餘即截留以作公用頃奉司札全數解省查永郡自經匪亂以後十室九空僅籌辦巡警學務兩項預算每年尚不敷銀六七千兩當此瘡痍滿目此項不敷款項勢不能再取之於地方擬請將年收湯判銀兩除照舊章仍以四百兩解司外餘款暫行留作地方補助巡警經費之用俟兩年後地方元氣稍復民力稍蘇再行全數解省請予轉電等情前來查永當匪

亂之後巡警最爲急務而經費奇絀籌措無方該守所陳各節實係爲維持地方起見
惟事關財政可否照准飭司立案希核示爲盼等語譯發去後頃准軍政部巧電開文
電悉所得徵收課款前飭悉數解省作各官公費警款一概由地方自籌惟永昌現值
彫敝之後情形不同自應照來電特別照准除令財政司立案外特覆等由准此除令

永昌府自治公所

外合行令知爲此仰該守

治公所

即便遵照切切此令永昌府知府永昌自治公所

爲命令事照得永昌向稱繁盛商旅輻輳自經此次兵變之後市場蕭條商情渙散自
非將商務分會組織成立實不足以合團體而圖振興現今各府分會成立已多永昌
尤難再緩爲此仰該府即便遵照召集本郡各幫紳商妥速會議組織辦法并限三日
內公同推選明白事體熟習商情富有經驗家資殷實之紳商二十八人分別充任總董
參議長參議員各職俾得尅日成立以培元氣而振商業切切此令右令永昌府知府
由守

省城軍都督府鈞鑒永昌亂後市肆蕭條商務減色現與府紳會議組織商務分會該

會職員並飭公推呈請委用查有楊正芳堪以委充該會總董董友惠委充副董藍廷舉委充議長趙端李寶仁羅以禮高維翰馬世榮吳恒馬學儒馬惟德舒士俊張朝拱委充議員除分別委任外謹陳乞備案師長根源叩歌印

省城軍都督府鈞鑒永郡生齒日密教養不先無業之民仟百相聚若不拔本塞源雖峻法嚴刑終難制止源抵永後卽與官紳會議擬於永城設立習藝所一所凡無業遊民貧寒子弟令入所肄業以免趨於游惰該所所長查有鄭永熙堪以委充除札委並飭將該所一切辦理章程稟承由守妥擬呈核外謹陳備案師長根源叩歌印

爲委任事照得永郡素稱多匪非我永昌人民獨異於他郡也生齒日密教養不先無業之民仟百相聚飢寒流爲邪僻桀驁習與性成小則草竊以害鄉里大則剽劫以禍地方峻法嚴刑莫可制止卒之機芽潛伏滋蔓日深潰溢橫流遂釀鉅變本總司令實痛悼之茲者茲後懲前所貴清源正本夫教育之效非旦夕可企而生計之籌實當務之急爰議設習藝所一所凡貧民子弟皆令入所肄習俾其各有執業以免趨於游惰

查有鄭紳永熙堪以委充該所所長月支薪水銀十四兩所有該所開辦章程及一切辦理規則即由該員秉承永昌府妥爲擬定呈候核奪除分別咨行外合亟給狀爲此仰該員即便遵照切切此狀右狀給永府習藝所所長鄭紳永熙准此右行永昌府知府由守

爲命令事照得永郡變亂之後亟應力籌生計前飭創辦習藝所一所以資教養並委任鄭紳永熙充當該所所長在案惟創辦之意不惟使貧民子弟得以資生亦將爲工業前途導其先路習藝所名目範圍較狹效用未宏亟宜量予擴張以爲推廣地步茲特改爲永昌府工藝廠前委所長改爲廠長地點即以舊日考棚撥與改修所有該工廠基本金一俟籌定的款再行撥飭製有應用各物招集學生教習擇期開辦以振工業仍將開辦章程及一切辦理規則商承永昌府妥爲擬候核定除行知外爲此令仰

該廠所長
商會

即便遵照會同辦理切切此令右令永昌府知府由守永昌自治公所永昌商

務分會永昌工藝廠廠長

批永昌府知府由雲龍呈永昌遞稟經費從實預算實不敷銀伍千元左右擬按照選民冊甲乙丙三級捐籌文

據呈已悉查永郡自經匪變善後亟待圖維本師長於抵永後上呼籲於軍府下勸募於隣郡凡公家款有可籌本師長力所能至者靡不百端規畫悉索從事期於地方要政得以綱舉目張昨飭該公所員紳將現有的款確實覆算一切經費大數已得每年不敷銀約肆千金因飭舉辦燈舖各項雜捐以爲補助旋據呈稱燈舖捐碍難辦理不得已按照選民冊甲乙丙三級飭令妥議捐籌而該紳等又謂願辦燈舖捐似此前後異詞毫無定見究不知該紳等宗旨所在當茲民國新造人民既有應享之利權卽有應盡之義務况以地方之財辦地方之事該紳等尙不力爲擔負爲社會倡吾不知代表之職謂何自治之義安在試一思之其何以對地方本師長行將去矣爲地方前途計不能不爲官紳告所望同心協力共謀進步庶幾補偏救弊實效可收頃閱該府來

文所呈各節良有概乎其言所擬辦法審時度勢尤爲切要應照所請辦理仰卽轉知該公所迅卽遵照該府所擬按照選民冊甲乙級分別擔任以認足五千元爲率其每級應認若干卽由該公所秉公妥爲支配至前案議決應收雜捐仍飭按期實行勿稍推諉延宕致墮要政而誤地方摘由批

省城軍都督府鈞鑒昨於到永後卽將乘勢搶劫府署在禁之衛隊哨長何春芳教習段天福及什長并土匪共十三名提訊明確立予正法電陳在案本日復將隨同搶擄在禁之衛兵二十八名鞠訊查有情節較重之陳海清一名并窩留匪贓犯婦劉楊氏一名一併正法以伸法紀其餘衛兵二十七名除飭由守分別輕重另案擬辦外合肅電陳師長根源卽卅卅印

省城軍都督府鈞鑒昨到永後卽訪聞地方巡警有勾匪搶劫情事茲派員拿獲永郡巡警教練所畢業生陳廷元一名訊據供認糾約土匪王廷樑等搶劫三牌坊如意祥怡興號兩家貨物并起獲財物可証又緝獲土匪余連朝一名供認夥同趙有禮等搶

劫熊家善家得贓不諱亦有贓物可憑當即正法以示儆懲在逃逸匪王廷樑等仍飭嚴緝究辦謹請飭部備案根源叩冬印

省城軍都督府鈞鑒昨在騰衝據雲龍州五井地方民人楊金呈稱去歲反正之後有永城關廟街住之段小常卽段厨子自稱段大人隨同杜文禮率領匪徒一百餘人來至五井地方肆行搶劫燒燬房屋佔霸該民之女爲妾不從卽被該匪槍斃等語當經電飭由守嚴拿管押訊辦在案昨抵永後又據商民王炳等公呈該匪於二月十一夜勾結散兵匪黨在袁氏街一帶縱火搶掠該民等眼見甘願質証當派員提訊該犯均各供認不諱卽飭正法以彰法紀合肅電陳并祈飭部備案師長根源叩卅一印

令照得永郡此次變亂原因土匪勾結散勇肆行焚劫以致地方遭其蹂躪并有士紳楊發榮陳匯淵劉元魁等或縱容子弟親隨出外搶劫或結納匪類乘機擄掠實屬藐玩法紀當將楊發榮等提案管押訊究雖該犯等飾詞狡展而地方攻揭甚力言之確鑿且楊發榮前任滿清武職貪婪卑鄙尅扣兵餉迭經告發自難稍事姑容應將該楊

發榮劉元魁二犯監禁三年陳匯淵一犯情節較重除家產前飭查抄撥充女子初等小學經費外仍予監禁十年以昭炯戒而快輿情合亟命令爲此令仰該府即便遵照辦理仍將監禁日期通報查考切切此令永昌府由守雲龍

省城軍都督府鈞鑒查永昌此次變亂有本城之土匪袁建勳約同黃鑑鋒宋寶奎營內兵丁李迎春楊海山唐松廷李開元等搶劫紳士夏從武家昨將該匪拿獲到案并起獲贓物百餘件派員研訊供認糾約李迎春等搶劫得贓不諱即飭正法示儆該犯妻馬氏收存贓物已飭監候待質贓飭事主認領又查李迎春等係順甯新興永北三屬人除電各該屬嚴緝李迎春等外謹陳乞飭部備案根源叩冬印

省城送新興州覽永城匪亂現經本師部拿獲匪首袁建勳一名訊據供認糾約營兵李開元搶劫得贓不諱查李開元籍隸新興現已携贓逃回仰即嚴密緝拿務獲訊明稟請正法勿得縱延總司令部東印

省城軍都督府鈞鑒本日拿獲從匪搶劫之永昌議紳劉元魁並其弟劉元善二名訊

據元善供認乘亂搶劫得贓不諱當飭將劉元善正法劉元魁供詞狡展應飭研訊確供再行核辦以昭信讞師長根源叩陽印

省城軍都督府鈞鑒前順雲協李學詩派所部國民軍第三營哨弁侯彩率兵十名赴騰請餉於陽歷二月十一抵永郡宿城內嘉樂店時值兵匪縱火搶劫該營正兵陸福春竟敢持槍威嚇侯哨弁估劫去紋銀拾陸兩及衣物等件并約同正兵朱家修羅文彬楊飛保趙樹三陳士清等六人乘勢出店搶劫逃逸經該協派兵拿獲朱家修一名訊據供認聽從陸福春出店搶劫得贓不諱稟報前來當卽批飭正法在案茲值該協交卸來永復將陸福春拿獲并起獲贓物多件解送來部派員鞠訊該兵供認不諱卽予正法以示儆懲仍飭上緊嚴緝在逃之羅文彬等務獲究辦謹陳祈飭部備案師長根源叩元印

省城軍都督府鈞鑒永昌匪黨自此次嚴密搜拿率多逃匿附近各鄉寨近因分派員弁率隊前往各鄉清查復敢暗布謠言希圖擾亂以致居民驚恐遷徙并訪有潛集洗

馬塘地方開立山堂情事當派員弁分頭嚴密偵拿茲據國民軍第十營趙管帶勳泰拿獲會匪周鳳鰲萬大年周鳳清楊二蠻即楊拴麥等四名並起獲銅帽槍四桿解案訊據供認聽從在逃周鳳朝趙鳳梧私立雲華公山堂迭犯劫竊各案並欲潛謀作亂各情不諱當經立予正法以昭炯戒除將槍杖存案並飭嚴緝首要各匪務獲懲辦外謹陳祈飭部備案師長根源叩巧印

省城軍都督府鈞鑒案據永屬周册鳳溪兩村紳民等解送素行搶劫之會匪楊朝珠劉金壽二名來轅當經派員會同永昌府提訊該犯等均供認實係開設公堂迭犯劫竊各案不諱此次永城焚搶該犯等亦經入城劫掠再楊朝珠一犯并供認與未嫁之堂姑通姦後復拐逃尤屬逆倫亂紀罪無可逭即飭一并正法以昭炯戒謹陳祈飭部備案師長根源叩敬印

省城軍都督府鈞鑒案據永昌轉運局委員李寶仁鹽商郭潤山楊達昌周厚基等稟稱前次騰永反正新添各營分紮永屬屢奉指揮陳雲龍統領彭莫劉竹雲錢泰豐等

命令飭將存鹽變價鹽課解繳以助軍餉寶仁共繳銀壹萬貳千壹百壹拾柒兩貳錢玖分潤山繳銀貳千玖百壹拾玖兩壹錢壹分達昌繳銀貳千零壹拾玖兩柒錢捌分厚基繳銀壹千零伍拾玖兩零捌分陸釐又據陳進將國時歐文才稟稱前統領彭莫委進等會辦杉陽鹽務飭將靈提舉存杉之鹽一概變充軍餉遵即前往經該管司事陳寅生點交進等淨鹽貳拾貳萬陸千叁百陸拾玖斤銀伍拾兩其鹽質低劣難以銷售進等雇工改造共賣合銀壹萬零玖百伍拾壹兩叁錢捌分加移交銀共計壹萬壹千零壹兩叁錢捌分除開支人工炭火及司事薪工各費銀陸百伍拾兩零肆錢貳分代銷各商欠銀貳千零柒拾壹兩伍錢捌分交由知府銀伍千零叁拾兩零捌錢伍分外實繳彭統領銀叁千貳百伍拾捌兩伍錢叁分該商等均稱給有收據並各附呈清單一紙當即發交白井督銷總辦楊大材密爲調查逐一核算呈候核辦頃據呈稱該員等所陳各節均係實情其開報數目亦屬符合請准核銷各等情前來查騰永起事之初情形至爲倣擾該員等處勢力範圍之下自不能不應其取求加以兵勇迭次譁

餉潰變間不容髮皆賴此以補濟遂得支柱一時則公家雖不免於虧損地方實藉以保全未爲無裨前據彭莫造報各欸以上各項課銀均在其內亦可證其尙無隱匿至該員商前處危機現各軍又經解散但使欸未入己自可准其核銷以免滋累如何之處仍候核示飭遵根源謹叩魚印

省城軍都督府鈞鑒據永昌轉運鹽局李寶仁稟稱該員前由黃提舉任內由永運騰之鹽因永屬潞江鐵纜橋折斷馬運阻滯遂堆寄沿途旋值反正騰永軍隊由此往來馬戶畏懼逃匿所存之鹽竊取一空其數在肆百餘駄約計有伍萬貳千觔之譜照騰價每百斤以陸兩伍計算約合銀叁千叁百捌拾兩現已分頭跟查迄無影響懇請轉稟俯准核銷並據白井督銷總辦楊大材調查屬實代請准其核銷各等情前來師長覆查無異可否准予核銷以示體恤之處乞電示飭遵師長根源叩魚印

永昌李師長鈞鑒奉都督發魚電悉李寶仁運騰鹽伍萬貳千觔果在潞江散失經查勿誤即准核銷財政司佳印

省城軍都督府鈞鑒據陳進蔣國時歐文才稟稱進等前辦杉陽鹽務所有各商代銷欠欸爲數甚鉅業經稟報在案旋即竭力催收除城外各商所欠之銀叁百貳拾捌兩肆錢捌分卽行如數收繳外惟城內代銷之陸振聲欠欸壹百陸拾貳兩壹錢叁分王嗣敬欠欸伍百叁拾伍兩陸錢朱炳南欠欸壹百伍拾叁兩貳錢葉茂春欠欸銀捌拾貳兩捌錢伍分范錫三欠欸銀玖拾伍兩肆錢柒分楊國棟欠欸柒百貳拾壹兩貳錢共計壹千柒百肆拾叁兩壹錢均稱此次匪亂盡被搶掠請求豁免並據該商等呈報被搶情形亦與該委員等所稟各節大致相同又據轉運局委員李寶仁稟報永郡匪亂委員所存鹽課被匪搶掠共計銀貳千壹百陸拾兩零伍錢玖分亦請免解各等情前來查該員商等被匪搶掠均係實情可否准其豁免核銷之處出自鴻施乞酌核電示飭遵根源叩陽印

李師長鑒魚陽電悉鹽欸攸關課餉本難議免惟此次永郡變出意外該鹽商等愴遭擄掠情殊可憫姑准如電豁免他處不得援例仍飭報由各該管井員將准免之數填

冊抵解並候令司知照都督府蒸印

省城軍政部羅總長李次長秘書處周惺甫兄鑒月密夔舉事在騰曾接尊電擬以李春輝接署當以善後待舉請緩一二月再請更易夔舉此次身當鉅變力摺驚危事苦心孤本不欲久羈於此惟到永後日與籌辦一切實見其與永人艱難共濟心膂相孚愛戴之深一時無兩方今煦沫埒循生聚教訓苟非恩信素著收效正復不易夔舉初來經驗猶疏今則動心忍性增益迨不可量不獨教養之務爲所長也現在地方匪類芟除就盡盜藪已清籌集之款約在二萬財力已厚另舉自治局紳率皆公正紳耆尤足資其贊助其餘地方行政亦皆整飭一新夔舉感永人之誠懇睹百度之粲然亦欣然願留熱忱尤不可及李春輝明穩精細源所素知前次出省曾擬約與偕來惟永事遽易生手接續之際弛張俱不易言至夔舉調省位置要在中秘教育間爲夔舉謀則得矣而非所以爲地方計也擬爲永郡乞留一年少亦以半年爲率既以竟其成功亦以遂其宏願李春輝遂於法學如於法制之中俾居一席似尤可盡其長源不敢忍置

永人亦不敢強留變舉頃與商確自任甚果尤喜公私兼盡如何之處卽希卓裁示復
根源叩宥印

省城軍都督府鈞鑒月密王太潛前經撤差飭由繆代聯長監視趕將經手交代辦理
完竣本日交代已清當由源會藩傳案詳加審訊據稱永昌起事之先卽聞黃鑑鋒等
圖謀肇亂因畏其勢大不敢干涉起事之日黃鑑鋒營屢至大隊請發口令初未允許
旋有本隊小隊長吳培源目兵蘇殿培吳成先王光忠持槍迫脅始發出獨立二字繼
聞槍聲四起各隊目兵半已離營少間愈形紛亂相率出外不能禁止及市面火起大
隊長亦卽出營看視次曉目兵始陸續歸隊共謀逃竄由守時亦至營與大隊長極力
阻止始漸安定嗣於是月二十六日黃鑑鋒復約大隊長及由守等在財神廟吃雞血
酒後奉飭回榆所封馱馬一百五十匹除公用六十馱外餘均各兵所擄財物又有各
兵估奪婦女二十餘口同行途次多爲本夫追回亦有半路棄置者大隊長無法禁制
祇好聽之各官長中惟第二中隊小隊長李元盛尙能恪守紀律極力遏止第一中隊

長郭昌明平日人尙純謹未必在場吳培源不與黃鋒鑑等通謀故帶兵持槍迫發口令小隊長王得勝劉景中朱雲龍楊世成司務長荻孟賢或夥同在事或被脅隨行均經出營大隊長不能約束乞寬典等語核與迭次所查情形尙屬相同查王太潛於永昌之亂事前既有所聞乃竟毫無防範致成鉅變臨事尤無約束任令所部官長目兵搶擄姦淫甚至明目張膽捆載財物脅奪婦女同行至今永昌人民畏軍隊過於盜賊軍人名譽掃地無遺實屬罪無可逭且事後并無片語隻字據實報告其爲縱容欺飾百喙奚辭若不明正典刑何以伸軍紀而謝地方擬請將該大隊長王太潛即行正法並將罪狀宣布週知吳培源等七員均於退伍後請假回籍目兵蘇殿培等三名亦經退伍回里惟離榆未久計尙在途現已分電楚雄等處嚴密查拿並派員分途緝緝務獲解案訊實分別擬辦源任命不當貽誤地方重蒙鈞府寬其置議負疚難安且法行自上乃足以悚軍心仍懇從嚴議處使軍中知法令之嚴雖在貴近不避而根源於將士之失益得執法以繩其有裨于軍政者實大是否之處伏候銜核示遵藩根源叩單

印

永昌由太守自治公所商務分會闔郡父老同鑒步兵第七聯第二大隊長實授協都尉王太潛縱任所部勾結匪黨焚搶永城裏脅婦女迨至開拔回榆沿途種種不法軍人名譽爲之喪盡本師長到榆後即行拿案會同趙巡按使審訊屬實電奉軍都督府覆電飭卽立予正法並宣布罪狀以昭炯戒等因當於本日遵電派大理府秦守提標楊叅將監斬訖特電通布知照並由該府出示通諭周知總司令部巧印

永昌由太守暨自治公所商務分會鑒前在永郡通匪謀亂夥同焚搶之小隊長王得勝正目管鳳雲趙玉來三員名據王太潛供稱該犯等均係哥老會巨魁素行不法永亂未起之先勾通黃宋二營兵丁秘謀焚搶起事之際不聽命令持槍出營擅入民家抄擄財物等語覆經本總司令訪查屬實聞其匿迹賓川即派員兵前往拿獲解送來轅飭第七聯長繆嘉壽大理府秦恩述會同審訊俱各供認前情不諱當經電陳軍府奉電飭將該犯等立予就地正法以昭儆戒遵於本日提出一併處決訖希卽錄電出

示宣布以謝地方總司令銑印

永昌由太守趙管帶及自治公所商務分會鑒源將解職永郡之事尙有數件不能釋懷略具於下一前次叛亂焚搶各匪及各棍盜現聞陸續回永務宜嚴拿分別處決具報以申法紀人名密達二富戶捐宜趕爲辦理若有希圖邀免並借故延宕者卽行責斥或嚴辦一二人以儆效尤總期務必辦成爲要三東方海尾宜籌款開濬以免淹塞鄭副議長辦事切實可委爲督工委員俾專責成四板橋金雞鹿鳴姚關施甸蒲縹等處地廣人稠宜籌款多設小學校以廣教育五前次清獲贓物變價若干概行撥作游民習藝所經費不在實業公司基本金之內六公所分會各員宜同心協力互相維持勿懷意見私相攻詰源以將去之身猶不能已于言者亦以桑梓誼切利害攸關不忍默爾而息也乞察根源歌印

西事彙略卷三

迤西陸防各軍總司令部編輯

永康之亂

永昌彭堯階弟錢君泰豐馬君登瀛鑒作電悉頃接紹三蒸電與來電同已電紹三轉飭派去之兩營痛加剿辦務將刀上達拿獲正法以靖邊防并囑於沿邊地方嚴爲防範勿令潛逃過界永昌距鎮康甚近並希協力防維情形隨時電知爲盼根源蒸印李師長鈞鑒昨屢據鎮康紳民紛紛函稟皆謂刀上達回鎮縱匪抄掠民不聊生懇派兵彈壓保護當即委員前往安撫旋據委員回稱該刀上達擁兵固守避不會面再三開導始行晤見兩旁排列刀槍居心叵測詢其百姓既受擾累何以不嚴加保護該上達佯爲不知卽調兵建壩窺其目的必欲復土職而後已否則即成反對委員寡不敵衆只得相機應酬除稟騰越張文光都督外謹稟請核奪等情嗣奉張都督派委先鋒隊第一二兩營前往相機勦撫去後茲據該管帶專快函稱部下奉委前往鎮康辦理剿撫事宜初二日由小猛統分路進兵一營由猛梯戶乃而進此二處已戰勝二營由

羊槽出木瓜寨進攻德黨初四午前八鐘將州治圍住午後一鐘一營接應合力圍攻該衙門十分堅固極難攻破至初五早六鐘二營管帶鄭明軒面帶槍花初四午後九鐘一營正哨官田子元亦面帶一傷雖有水師不甚佳請速聘水師一人星夜趕至以濟眉急現在所帶各種筆碼不多祈照數星夜運來以資應用而刀上達人數實有五千餘人如何辦理祈示知再此次兩路進兵均係果敢國民軍楊福順張致君帶兵引路向前查楊福順原係順甯縣人早年隨其叔楊某往麻栗壩貿易因麻栗壩劃歸英國其叔卽授爲果敢縣茲據楊福順前來投誠原爲我中國之人於公理尙無違悖但內有伊叔之轆轤恐啟藉口已函囑前途委婉拒絕如何容再稟聞特此電稟伏乞垂鑒錢泰豐馬登瀛彭莫叩佳印

騰越張紹三兄鑒蒸電悉昨接永昌作電情形相同并稱尊處已派張鄭兩管帶前往相機剿撫鄭管田哨均受槍傷等語查刀上達怙惡不悛卽予痛加剿辦亦不爲過請飭知張鄭兩營務將刀上達拿獲解訊正法請飭知各土司無得輕爲刀上達所惑派

兵助惡倘刀上達逃遁該境並應協力緝拏務獲解辦沿邊地方尤宜加意防範無任
潛逃過界如張鄭兵力尙單卽由尊處速派附近兵隊前往助勦特復根源蒸印

大理印泉兄鑒月前據永康州紳民劉天相魯效周胡順發馬玉堂段必祿魯國良共
七十五名聯名公稟謂鎮康由省釋回之士酋刀上達奉干崖土司刀安仁命令將改
定永康州集聚土黨數千乘虛竊擊仇殺漢民肆行搶掠奸盜邪淫窮凶極惡懇恩出
湯火解倒懸等情前來因派兵到彼相機撫辦不意該土酋怙惡不悛於永康州署四
隅建設礮樓各要紮立營盤下書約戰撫辦軍嚴爲對敵現尙未靖光思永康改流經
有數載人心歸定該土酋竟爾冥頑不化如此橫行何殊叛背祈鈞裁酌奪賜示遵辦
弟文光叩蒸印

大理李印泉先生鑒電敬悉當遵照辦理惟密查鎮康已革土司刀上達係爲刀安仁
暗許復職該刀上達卽仇殺漢民並將永康州知州陳文光謀斃似此行爲該土司等
居心難測恐有尾大不掉之勢弟欲將刀安仁所強逼領取保邊界之快槍三百桿逼

碼五萬如數追回如荷允准祈電飭伊追繳以便遵行弟文光叩蒸印

騰越張紹三兄鑒蒸電悉刀安仁携去槍碼係屬公物務須如數追回設該土司違抗不繳卽以兵詰責無事姑容源不日卽率兵到騰特復根源叩灰印

李總司令趙樾老兩公鑒蒞騰籌辦善後沿邊欵賴感激同深干崖前次領去槍枝已允如數繳還地方安謐請釋錦注旌節何日啟行祈先示知以便單騎赴永歡迎用輸忱悃文光叩覈印

李師長鑒月密真電悉查刀上達前因搆亂監禁省獄多年忽於去冬潛逃回籍現復擁兵反抗非亟加勦辦痛斷根株不可西事得兄解決甚速然騰軍甫就範圍土酋又復蠢動設煽各土司以相援應或入緬甸以爲護符後患皆不堪問且騰永各營能否照約裁撤裁後能否各安生業不生事端皆不能不計慮西防邊務胥賴我兄經營入川之行似可從緩乞賜覆鐫元印

永昌彭堯階弟鑒箇電悉鎮康漸次平定慰甚惟刀上達在逃未獲務望飛速加派得

力員弁分頭跟踪躡緝獲即就地正法勿令遠颺是爲至要弟才具優長實深倚畀赴永在即一切面罄根源養印

省城軍都督府鈞鑒永康之亂因刀上達謀復土職刀上達之敢於爲亂因刀安仁許復土職刀某暗助兵械其間寄居緬屬果敢原籍順甯縣人楊福順等自稱中國國民軍總司令率衆由麻栗堪而入張文光彭莫等派委之先鋒第一營管帶張祠樑二營管帶鄭明軒由小猛統板戶乃而入同會於德黨州城其時刀上達糾結夷衆佔據衙署四面築碉與楊黨張營鄭營宣戰抗拒陳牧文光避至邦密壩遇害所屬猛朗李巡檢小猛統蒲巡檢亦先後被戕嗣刀上達戰敗逃逸張營調回楊福順等及鄭營仍留永康地方糜爛達於極點陳牧人尙有爲初至該州急欲爲地方興利到任旬日即罹慘禍尤爲可憫昨委和朝選前往接署州牧兼節制鄭管一營鄭管行爲亦多不法暫示羈縻容後查換該州兩巡檢現均缺員猛朗一缺查有李國俊人尙明白擬委往署理到時斟酌情形移駐麻栗壩該地與英緬接界藉便巡緝稽查小猛統一缺僻在夷

地且屬烟瘴亂後人更視爲畏途查有封鎮國熟習夷情雖名譽稍劣而才具可用擬即委往署理已分別頒印給委乞飭部備案至楊福順等由緬而入國界所關雖無滋擾亦難優容該楊福順且敢串竊永康團總士庶百數十人姓名遞稟彭蔭請管理鎮康世守其職明冒中國之國民暗欲佔中國之土地貪妄已極雖經彭蔭嚴詞駁飭現尙擁兵逗留已令和牧諭令迅速率衆回國如敢抗延即照土匪剿辦刀上達逃匿無踪亦分飭嚴密緝獲日并窮治黨羽一并呈請究懲合先電陳師長根源叩儉印爲密飭知照事照得寄居緬屬果敢縣原籍順甯縣人楊福順等此次乘改革之際自稱中國國民軍總司令闖入永康向先鋒第一二營投誠當彭統領蔭接據該兩營管帶報告會飭令力予拒絕并直接函知該楊福順等令其仍率軍隊暫回果敢駐紮不必過界乃該楊福順等不惟逗留不去且串竊永康團總士庶馬玉堂等百數十人姓名投稟彭統領處保伊管理鎮康世守其職伊等既稱原爲中國之民乃欲乘亂侵佔中國之土地不惟與宗旨不合亦且爲法律不容該州到任應卽傳集開導令其迅速

率衆出境毋再逗留如敢抗延本師長卽當以治土匪之法治之立地派兵剿辦後悔將無所及辦理情形如何隨時密陳至該屬猛朗巡檢分防地方距州治僅四十里分駐既無所事事同駐州城亦屬贅旒查麻栗地方緊接緬屬果敢稽查出入緝捕盜賊均關緊要該州到任并卽督飭該巡檢團紳馳赴麻栗附近一帶切實勘查務擇一當衝扼要之地將猛朗巡檢移駐於彼一面卽將勘定地方繪圖貼說具文飛報再行改頒印信以昭信守

除札飭外亟應行知爲此仰該守卽便知照特札

併仰遵辦切切勿違特札右札永康州和

牧朝選永昌府由守雲龍

省城軍都督府鈞鑒頃據永昌由守雲龍電據駐永康德黨國民軍鄭管帶明軒星夜飛稟州屬有匪首穆大賚復勾結刀匪上達聚匪三千餘人在蘇家寨一帶肆行搶掠分撲州城勢甚猖獗該營力薄難期剿除請派勁兵往剿等語查和牧朝選今尙在途請速派軍隊往剿等情復據張協督文光來商擬派黃鑑峯宋學詩兩營前往剿辦惟查騰永各軍現當裁併改編之際黃宋兩營均應調騰力加陶汰另予編制未便又行

更調茲仍由源遣派隨同來騰之第七聯第二大隊第三四中隊飭該聯教練官徐鴻恩率隊於陽日起程馳往剿辦務在殲除刀匪驅逐楊福順出離該境并解散鄭明軒所部兵勇以靖亂機而固邊圉謹陳師長根源叩麻印

永昌由太守黃君鑑鋒宋君學詩李君光斗王大隊長同鑒敬電悉永康土匪勾結爲亂當經與張協都督會商初擬派宋管帶率領所部前往剿辦惟查宋管帶部曲迭著勤勞現當改編軍隊之際應卽率隊來騰聽候編制未便再行更調現已由本司令部派遣第七聯第二大隊之第三四中隊由該聯教練官徐鴻恩率領於陽日由騰出發飛速馳往剿辦矣一切防範事宜卽希會同督飭各軍隊妥爲辦理隨時電知爲盼
總司令部麻印

爲密飭遵辦事昨據永昌由守黃管帶等歌電稟稱本日據駐德黨第二營鄭明軒飛稟有匪三千餘人在蘇家寨肆搶經派杜哨往查旋值叛兵相拒互有殺傷以力薄退回探係穆大賒陰勾刀匪作事所屬有叛兵數千欲撲州署我軍僅二百六十名鎗械

半係銅帽且銅帽用盡未能抵敵云云除再飭詳探外飛速電聞速即迅派勁兵一二營星夜赴援以免滋蔓再和牧朝選計尙在途合併附陳等情據此查永康改土已及三年地方尙稱安靜此次乘改革之際寄居果敢原籍順甯縣人楊福順等謬附革命率衆闖入始在邦密坭戕斃州牧繼赴德黨攻撲州署其時甫釋罪囚刀上達因受干崖土司刀安仁之唆使南甸土司之協濟勾結穆大賚等煽惑土夷各處嘯聚殺掠漢民謀復土職繼騰永所派之先鋒第一二營張祠樑鄭明軒等開拔前往楊福順赴軍投誠爲之嚮導刀上達恐其圖己與之衝突而該軍又復紀律不嚴到處滋擾地方糜爛遂不可問現在新委和牧尙未到任楊福順等聚衆盤踞屢經已故彭督帶冀諭飭出境逗遛不行穆大賚前已竄伏因地方一時未定復敢陰結刀匪聚衆爲亂楊福順等之舉動固極悖妄刀匪穆匪及附從各匪尤屬罪不容誅該教練官此次前往剿辦刀匪穆匪如敢率衆持械抗拒即痛予剿除如聞兵到星散即一面搜拿刀匪穆匪及著名爲首爲從各匪說明分別在軍前正法有捆獻刀匪者賞銀一千元捆獻穆匪者

賞銀五百元驗明領發并先出示宣布一面安撫各賧夷衆解散脇從免予窮治以揚仁風俟軍事粗定卽會同和牧勒令楊福順等迅速率衆出境毋再逗遛如敢抗延卽照土匪例立予拿辦鄭營名雖爲兵若久聚而不散地方必受其害事定之後并卽商同和牧妥爲解散收回軍械酌給川費不准逗遛如違并准以軍法從事本師長爲安輯地方驅除匪類起見該教練官務須善體此意分別次第妥爲辦理仍隨時將勦撫辦理各情形密速報告請示辦理勿違特札札第七聯教練官徐鴻恩

永昌由守轉永康州和牧覽魚電悉昨據由守轉報永康匪亂當卽派第七聯教練官徐鴻恩率領步兵兩中隊於本日午前十時馳往永康會同該牧認真剿辦務期殲厥渠魁安輯夷衆以爲該牧已經到任計必先有布置乃該牧遲遲而行復於半途聞警蹙回置地方而不顧殊出意料查徐教練指日卽抵該州仰卽迅速星夜馳往會同徐教練趕將該州屬境匪衆尅日撲滅解散設法將刃上達穆大賧等拿獲到案驗明正法該牧務須自顧責成毋得畏葸切切總司令陽印

省城軍都督府鈞鑒本日接徐教練官鴻恩永康州和牧專函稟稱本月十二日教練
至姚關與知州相遇十六至小猛統據團長羅金報稱刀上達匪黨約有千四五百人
盤據郟底一帶當即會商知州次日率隊進攻行至南廣獲刀匪偵探二人並洋槍二
桿訊明立即正法知州於是日赴德黨視事卽飭防團分投躡緝擒獲刀匪之軍官陳
明方及其黨羽六人訊稱刀匪與耿馬土司罕華基係至戚有密約罕願資助銀二千
快槍二百五十桿刀願割十戶土地以謝罕云云教練十八午將抵郟底匪約六百餘
人猛然撲來勢若大敵我軍迎擊鏖戰約三小時斃匪三十八人奪獲銅帽槍十五桿
火繩槍十四桿刀矛無算餘即潰散次日大索獲活功武老三張四老六三人遂押解
德黨與知州會訊所供俱與陳匪同當卽一併正法惟陳黨六人訊實均係脇從均經
省釋至先鋒隊第二營管帶鄭明軒哨長杜萬祥劉中和及冒充總查之賈正明肆行
搶掠行同盜賊均於知州未到之前相率潛逃鄭帶有快槍十六桿杜劉帶有快槍十
三桿銅帽槍九桿前存銀物亦被擄一空其第一營管帶張祠樑幫帶唐明臣前在永

康貪暴尤甚所過之處搜括無遺其罪殆浮於鄭雖百磔之不足以蔽其辜請嚴拿徵辦果敢楊福順聞我大軍將到畏懼潛逃不知去向惟永康自經此次擾亂之後居民流亡殆盡經教練知州沿途出示招集並曉以軍府撫育邊民之意及師長愛民伐罪之心始漸遷復惟元氣大傷補救匪易凡學堂之書器州署之案件化爲灰燼無片紙留存且地屬煙瘴我軍駐此不服水土多感時疾可否准予調回現有先鋒隊第二營幫帶李有福所部之九十二人及知州衛隊駐紮李幫帶尙知約束軍士遵守紀律惟兵力仍形單薄清添派國民軍一營以資鎮懾各等情請示前來當即分別函復據稱刀匪潛逃耿馬現已派員前往偵察相機稟辦李有福尙有紀律請以幫帶記名飭其暫行留駐該州俟劉管得勝到時再爲解散並飭徐教練官率隊尅日開回取道順甯抵順後聽候本師長電命進止奪獲槍物飭由和牧解交由守收報所請拿辦各犯除張祠樑唐明臣業已正法餘並飭其出示嚴拿務獲究辦以杜後患再該州僻處邊徼甫經改流加以刀匪迭次倡亂人民流離失所辦理善後尤爲棘手除飭和牧招撫流

亡勞來安集及另電第十七營劉管得勝迅速開往防紮外理合電陳伏乞鑒核師長
根源叩宥印

永平局送雲龍蘇牧劉管帶得勝同覽頃接永康州和牧徐教練官函稟永康事已平
定現飭徐教練官率隊回檢查永康係定爲劉管帶衛戍地電到希即率部尅日出發
前往填紮以資防衛並將出發日期電復雲龍兵力單薄已電令大理李提台將蒙化
所駐半哨移紮矣總司令宥印

省城軍都督府鈞鑒本日接永康徐教練官鴻恩和牧朝選二月勘日專函稟稱本月
漾日探悉永屬邦卡等處尙有匪三四百人嘯集教練等當卽會商派第三中隊長蕭
雲程率隊前往節節圍攻擊斃匪十九名奪獲銅帽槍捌桿銅鏝二面刀矛數十件翌
日入山搜查復擒獲匪黨魯國中羅春華二人又派先鋒隊中哨官鄧傳興率隊分往
猛捧漢家寨等處攙勦擊斃匪十三人捕獲李光明李小七林兆麟等三名訊明李光
明係罕華宗之隊官李小七林兆麟係李光明之從匪均籍隸耿馬魯國中羅春華籍

隸德黨亦係罕華宗所遣來接應者並據稱刀匪上達及張學禮劉老八等均在此馬
意圖恢復所有軍餉均罕土司協助云云除將魯羅兩犯立予正法外其李光明等均
押州署知州飛函至耿馬飭將刀匪解州即將李匪等釋回尙未據復惟查永康漢夷
人等投誠於刀匪部下者甚多聚散無常時出時沒我軍跟蹤追擊則逃入耿馬幾視
該地爲逋逃之藪該土司罕華基不能協緝其胞弟華宗復敢擁兵入永任意燒殺似
此甘爲戎首懇請酌核辦理等語查耿馬窩留土匪私助軍餉前接徐教練等函稟業
經派員前往密爲偵察茲復據稟各節當卽函飭徐教練率隊先到耿馬名曰安撫暗
爲訪查如果該土司窩留刀上達屬實卽飭將該匪交出懲辦脅從免究所率兵隊飭
其嚴守紀律不准稍有滋擾到耿二三日後卽行率隊由順回榆並另函和牧出示割
切曉諭凡從前爲刀匪迫脅者勿論漢夷概免究治准其各安本業以免流離所獲李
光明等三人仍監禁州署以備質訊槍刀各物解交永昌由守彙報復將該牧等所陳
各情電飭順甯張守李協就近密派妥員前往查明稟復仍由張守轉飭耿馬土司嗣

後遇有永康逃入匪類務宜不分畛域協緝兜拿以靖匪風而固邊圉合併電呈伏乞
鑒核師長根源叩庚印

省城軍都督府鈞鑒國民軍第十七營劉管帶得勝於篠日率隊抵永昌查現在永康
土匪時虞竊發渠魁刀上達尙未就獲徐教練兩隊已調赴耿馬該處僅有先鋒隊第
二營兵九十二名甚形單薄擬飭該管將全營一併開往永康分別填紮以資鎮攝至
先鋒隊兵九十二名卽由該管到時會同和牧飭繳槍械一併遣散每名發給恩餉銀
二兩並給路票令其迅速回籍各安生業不准逗留該營幫帶李有福據和牧函稱人
尙誠樸可用已准其以幫帶記名回騰聽候差委所收槍械仍由和牧解交由守查收
彙報其遣散恩餉銀約需三百金卽於由守處按數領取該營兵丁准在永休息一日
皓日開拔購牛一具以爲犒賞所有遣散及防緝各情形隨時稟報再永康迭經匪亂
瘡痍滿目並飭與和牧會商撫恤嚴束所部目兵不得稍有滋擾以保軍人名譽除飭
辦外謹電陳明師長根源謹叩巧印

爲呈報事案據永康州知州和朝選稟稱竊知州於三月初四日會同李有福督率先鋒隊馳往白虎山調查叛亂情形曾經稟報在案茲於十一日旋署奉下各節謹遵辦理現在流離之民均漸安業惟猛捧街場前經白虎山匪類燒搶所有貨物牲畜皆被該匪等搶掠一空房屋亦被焚燬知州目擊此情不勝慨悼遂集該處頭目力爲勸導並飭猛朗李巡檢駐紮其地一以防緝盜賊一以安定民心白虎山附近有匪數百盤踞其間經知州督隊攻擊業已逃散其匪首毛三羅二新街阿六李二鐵匠等逃逸未獲出示懸賞緝拏查白虎山距州治二百餘里地勢險惡懸巖洞壁道路羊腸知州將匪擊散焚其巢穴永康西北一帶可無他虞矣知州前移請耿馬土司緝拿刀尙達頃聞該土司已將刀匪及其黨劉文華張學禮劉國興等拿獲查刀匪與該土司原有姻親之誼不無袒護之心懇請嚴飭罕土司迅將刀匪交出懲辦以絕後患等情據此除批示并行知順甯府轉飭耿馬土司迅將刀上達交出解案究辦外理合具文呈報鈞府俯賜查核施行須至呈者右呈軍都督府

爲呈報事案據永康州和牧朝選稟稱竊知州頃據永康州屬團紳馬玉堂段必祿羅金張文洪等呈稱永康地方自滿清光緒三十二年改流以來安設漢官從無苛派擾累情事舊歲九月反正有劉文華張學禮等前往南甸勾結刀上達潛入州地坐鎮永康任意勒派永康七區每區派民夫五十餘人馬二十餘匹共派民夫叁百伍拾名馬貳百匹槍壹百桿於十月內前往南甸土司官署迎接伊母並眷屬等冬月事敗刀匪逃逸伊母及眷屬未來所有派去民夫馬匹槍械概未見返回實係南甸土司截留該民夫父老屢次來團追究人馬槍械懇請轉詳追究等語知州伏查屬實理合繕稟懇請轉飭南甸土司照數繳出俾民夫得歸故里以免離析等情據此除批示并行知騰衝府轉飭南甸土司遵照迅卽將人物槍械晰數交出外理合具文呈報鈞府俯賜查核施行須至呈者

省城軍都督府鈞鑒案查永康先鋒隊第二營潰散所餘之幫帶李有福部下九十二名前飭劉管得勝到永卽行遣散每名准給恩餉銀貳兩曾經電陳在案頃據和牧稟

稱劉管帶三月三十日抵永康次日卽與知州會商飭令李有福將該營弁兵等一概給餉繳槍遣散計哨弁三員書記生二名兵丁九十二名共發給恩餉銀式百兩收繳九响毛瑟槍三十四桿單响毛瑟槍十一桿哈乞開槍九桿漏底無煙槍一桿銅帽槍十一桿九响筆碼原箱一駄零碼二千二百八十四顆無煙筆碼一百三十顆哈乞開筆碼五百三十七顆皮帶五十四根其遣散弁兵均由知州給予路票飭其尅日回籍等語除飭該州將所收各槍彈解交由守收報外祈查核飭部備案師長根源叩眞印咨案據署永康州知州和牧朝選申稱民國元年三月三十日奉命令開准軍政部魚電開據鎮康土知州刀悶純燬申及土目九戶劉文義等稟土目段必祿等誘殺前永康州陳牧文光並私往英屬麻栗俱蠻約楊六少爺招集亡命匪徒攻打木瓜寨猛扳鳳猛統等處肆行燒殺槍掠民財土民等到南甸迎接刀悶純燬回鎮又奉騰越札委等情查前奉尊電暨陳牧家丁稟估署戕官係刀上達茲據申自署刀悶純燬顯係蒙混取巧除另備文咨會並行司外特先電請查明嚴拿重辦並復都督府軍政部魚印

等由准此合卽錄電令知爲此仰該州即便遵照查明刀悶純嘏是否卽刀上達抑係前故土司何人現在是否在鎮迅速稟復核辦切切特令等因奉此遵查刀悶純嘏實係刀上達前故土司表侄本姓罕氏因前故土司嫡支刀悶純祖刀悶純喜亡故該罕上達冒姓更名意欲承襲經前清慎督錫良奏請土司乏嗣應卽改土歸流着將該上達監禁核辦在案此次反正胆敢乘機與刀安仁伙同竊發糾集夷匪佔署戕官又聲張興夷滅漢肆行搶掠經前先鋒隊各營奉令征勦該上達畏罪投竄耿馬二次見永康兵力薄弱復糾夷衆再行燒殺經知州稟請特派陸軍暨先鋒隊州屬團勇等分別勦撫刻已就緒該上達及著名夷匪逃竄耿馬現經移知緝捕未獲在案該上達不省罪狀仍自申署刀悶純嘏顯係蒙混取巧理合具文申覆等情據此除批示外相應咨請貴部查照施行此咨雲南軍政部總長羅佩金

省城軍都督府鈞鑒永康刀匪上達植反正之初謀襲土職煽惑夷民聚城戕官焚漢居民當經派兵勦辦該匪聞風遠颺並懸重賞嚴行緝拿各在案茲據順甯府張守掠

臬督同耿馬土司罕華基將該匪在耿誘獲並派衛兵長張忠和到耿提解來永驗明屬實除派師部委員杜澍會同永昌府由雲龍訊擬稟辦外所有張守及罕華基忠樂和等擬請分別給獎以示鼓勵可否乞電示飭遵師長根源叩印

省城軍都督府鈞鑒昨據順甯府張守將刀上達即刀悶純緞派兵押解來永當派杜委員澍會同永昌府由守研訊據該犯供稱前由省釋放回家即住南甸土司刀定國處去年六七月間有永康土目楊士榮等二十餘人前往南甸迎接該犯因無隙可乘遂不敢去後於九月十四奉都督刀安仁命令書令該犯即速帶人前往佔據永康驅逐官吏刀安仁并面囑該犯祇要能逐官佔城即令襲職如兵力不及刀安仁應允派兵協助該犯即向刀定國要求派族目刀守禮及隨從數人并槍械多件與土來之接目楊士榮蔣應貴等四十餘人各執槍械於十五日前往該犯即先遣土司派人速飛回去告知永康各處頭人調集團兵迅將官吏驅逐地方佔據並派團兵半途迎接該犯行至七道河蠻埂地方有土目羅天福王五等率領團兵二千餘人前來迎接並報

知陳牧文光已被張文洪之弟張老六王四誘殺於邦密並將蒲戴李三巡檢及陳牧幕友黃湘生等一併殺害陳牧存署銀物均被段必祿搶去該犯於二十七抵德黨佔據州署卽派大叢莫子惠等率帶團兵分投駐紮要隘一面派人帶兵往南甸接其母并眷屬等十月有緬甸果敢縣屬之楊春浩帶兵過界欲佔德黨因不知虛實未敢來攻旋有李光斗馬洪發帶兵至城垣賴庄一帶前來攻擊該犯之團兵不敵即退回德黨李馬二管始與張祠樑鄭明軒揚春浩等會同於冬月初四圍攻德黨該犯力不能支於初五夜逃出德黨潛往耿馬藏匿因恐被拿復逃往葫蘆王地方復被耿馬土司派人哄出解交順甯府轉解來轅等供並據呈繳刀安仁所給命令書一扣內署雲南軍都督刀名稱蓋有紫粉都督府印並有如有抗違即便派兵擒殺等語查該犯所供各節核與迭次所查情形相同除仍發府監禁另電核辦外謹先電陳師長根源叩刪印

省城軍都督府鈞鑒刀上達一犯昨經拿解來永派員會同由守訊據該犯供認受刀

安仁命令帶人佔據永康驅逐官吏各情業經電陳在案茲飭覆訊供認如前查該犯刀上達卽刀悶純嘏前在滿清時代卽因爭襲禁錮有年該州改流以後始行省釋此次騰永反正復敢乘機肇亂倚刀安仁爲奧援結土目爲牙爪戕害官吏佔據地方以致引動外匪楊春浩等召聚徒黨擾亂邊陲燒殺擄掠罪不勝誅且永康地方迭經煽亂夷心浮動綏輯爲難該犯狼子野心尤恐留爲邊患擬請卽行正法以昭炯戒而除亂源再前據順甯府張守電稱拿獲之餘匪李德明李玉才楊鴻芳等三名經電飭詳訊稟覆應俟稟覆到日再行核辦伏候衡核示遵師長根源叩敬印


李師長鑒敬電悉刀上達著卽正法餘匪李德明李玉才楊鴻芳希飭順甯府迅速訊明電呈核辦都督府沁印

省城軍都督府鈞鑒刀匪上達於感日遵照正法並將該犯首級解往永康州德黨地方示衆仍錄該犯罪狀出示曉諭餘黨三人已飭順甯張守迅速訊明稟辦矣謹陳師

長根源叩豔印

省城軍都督府鈞鑒頃接永康知州和朝選電稱前已正法刀匪上達之黨著名匪首劉國興一名逃匿耿馬現經該土司送解來署驗明屬實可否就地正法等語查劉國興係刀黨巨魁素行不法此次永康之變係彼主謀刀匪之來係彼迎擁陳故牧文光等之被戕害亦係彼所嗾使非立予正法不足以昭儆戒可否准如該牧所請辦理乞核示飭遵師長根源叩 微印

李師長鑒微電悉劉國興即准該牧就地正法以清遺孽都督府齊印



西事彙略卷四

迤西陸防各軍總司令部編輯

榆軍退伍

大理孫聯長鑒奉軍都督府命令榆聯目兵現役期滿旋值反正未及退伍現在大局
安咸思休息該目兵等在伍日久鄉關之念室家之情在所難免且前已發布准其
退伍尤不能再失信用希將駐榆軍隊及由省帶騰舊兵每隊酌予四分之三先行退
伍以示體恤等因查方今大局已定諸軍士勞苦亦深霜露溫清之思甯不動懷自應
遵照軍府命令准其退伍仍由該聯長傳布此意代爲慰勉本師長與諸軍士甘苦與
共生死一心倘將來國家有事仍宜出而効命庶不負我軍人之天職電到希卽查照
先將鍾大隊駐榆兩隊陳大隊一隊及施繼伯中隊刻日退畢餘俟王大隊長嚴督隊
官所帶各隊撤回再行辦理其退伍目兵每名各給恩餉銀貳兩填發功牌一張至募
補新兵事宜俟源到榆核辦並將辦理情形電復查考根源叩感印
省城軍都督府鈞鑒月密昨傳鈞府命令飭令榆軍退伍經具感電呈報查榆軍驕恣

放佚深爲隱患源到榆後日夜切慮幸因騰永之事分調散紮以分其勢一時暫安要非久計近據由守前後來電密陳榆軍駐永群情怵懼匪亂雖定安輯尤難堅請赴永情詞迫蹙又據秦守密電各隊老兵率皆滾龍施中隊亦七十四標老兵恃功而驕不受管束出入自由夜不歸隊尤可慮者無論何隊均係拜會弟兄明目張膽勾結橫行施陸兩隊曾小起風潮幸卽消弭元旦迄今演劇請客毫無忌諱聽之不可禁之不能幸恃各隊官長羈縻連絡未致滋事而禍機所伏岌岌可虞各等情孫聯長來電情形相同反復籌度舍退伍外別無消弭之策源前在榆曾集各隊官長以此相詢僉稱老兵頗有歸志退伍亦所甚願初擬俟源回榆督率辦理而李統領德泳現尙未到騰事布置未清遽難啓行因擬乘各隊分紮在外先將駐榆目兵退畢然後飭令次第回榆陸續退伍以免聚於一隅愈難着手惟熟審情形榆軍退伍後能各回籍自可無事否則散後仍聚更藉結會爲聯絡與匪混合均屬可虞尤慮舊兵方經退伍新兵尙未徵集乘機肇事不能不防至第一二兩大隊舊兵半係川人並非土箸退伍之後散漫無

歸益難防範然榆軍積習至此留伍爲患滋大証以秦守等電稟各情禍機之發旦夕可慮實逼處此不容躊躇再計現已密飭孫聯長秦守嚴密防備審慎辦理一俟李統領到此趕將騰事部署卽行回榆以備不虞源受命以來內外交訁事變輻輳窘於應付惟念責任所在不敢避艱險計利鈍勉竭心力以圖補救如能仰託威福得以從容就理則西防庶可安枕隱憂或可潛消謹電具陳伏乞訓示根源叩勸印

大理自治公所鑒刪電悉榆聯舊兵退伍卽應續徵新兵其徵募事宜俟源回榆卽行舉辦騰事布置已妥現飭劉聯長率隊於舊歷二月初一日開拔回榆源定於初七由騰起程榆城有孫聯長鍾陳二大隊長防維綏攝萬無他虞希卽轉告紳民勿相惶惑以自擾也此復根源刪印

騰越李師長鈞鑒太和地方雖屬大定而民心易致惶惑且有存儲餉械關係匪輕現值陸軍退伍謠言一日數起鎮懾保衛兵力究嫌單薄公軫懷綏靖俯察輿情擬請就縣屬土著人中認真徵募一二營以補退伍之缺而救目前之急其於地方治安裨益

必非淺鮮是否有當乞速示復太和自治公所員紳范宗瑩周霞等全體刪叩秦恩述
加印

大理孫聯長秦局長覽頃據丁督隊官恩遠電稱隊官所部目兵因到榆不久回籍路
遙領餉無多以之製衣又無盤費仰懇將由省所發舊棉衣褲鞋賞給該兵等著等
語查該隊係由省率帶來榆據稱回籍路遙請將由省發給舊棉衣褲鞋給與該兵等
穿着應卽照准以示體恤惟他隊不得援以爲例希即轉飭遵照劉純武李鴻翔等四
員本日到騰并聞總司令部多印

大理鍾大隊長覽刪電悉該營此次退伍式百捌拾餘名而軍心帖服地方安靜非平
日督率有方曷克臻是凡退伍各目兵務宜優加慰勞告其迅速回籍以篤親親之義
而享家庭之樂切勿在外稽留以致流於游惰是爲切望此復師司令部銑印

騰越師長憲鈞鑒支密奉悉退伍辦法已與聯長熟籌詳審決無意外且近日官兵尤
守紀律重名譽祈紓垂念自治團體會早經遵面諭取銷奉到告示二張當卽宣布仍

請添發多數俾便廣爲張貼尤所切叩步七聯第一大隊長鍾湘藻謹叩佳印

騰越師長憲鈞鑒元日藻營退伍二百八十四名計尙有新舊兵百名左右兩中隊尙未抵榆屆時續爲接辦兵心甚慰地面亦安請杼鈞系受業鍾湘藻叩刪印

大理孫聯長覽鍾陳兩大隊及施中隊長部下退伍目兵各有若干名現留伍目兵各有若干名王大隊長何日抵榆希詳細電復徐教練刪日由永康回永已電飭率隊於皓日起程取道順甯回榆並聞總司令部巧印

騰越師長憲鈞鑒巧電敬悉鐘大隊退伍目兵二百八十四名現留二百五十一名陳大隊擬俟王隊回榆卽行酌退施中隊退四十一名隨隊長赴騰三名開革三名現留八十四名王大隊已往調約於號日可抵榆俟到時再爲稟報再鍾大隊之第二中隊聞係奉命取道雲龍尙未到榆併聞紹騫謹稟皓

大理孫聯長鍾陳兩大隊長丁何兩督隊官鑒囑電悉此次退伍之事非諸君子匡弼暨我軍士用命不克臻此現在陸續退伍閭里宴然尤足見我將士上下一心自可以

破妄議惟匪棍造謠構煽實屬妨害治安希卽嚴行查拿從重懲治勿稍寬縱商民愚
闇無端遷徙並希會府出示剴切開導禁止以定人心至功成身退吾輩同此素心惟
當大局初定之時尙非吾儕息肩之日他日出處之際當與諸兄共之此時惟以顧全
大局爲職志外間浮言無足與較也返榆在卽一切面罄根源皓印

大理孫聯長鑒地密此次軍警交閱辦理最爲得法至力顧大局不存意見尤深佩慰
各隊官長目兵均經分別處罰已足以彰軍紀其爲首生事之人能自行交出固善否
則仍希飭令一面退伍一面查辦首犯即在三四日內辦理完竣此次受傷之人既係
木器毆傷當無大礙不必因此而緩退伍期限也王大隊所部擬飭全數退伍餘由台
端酌量先後分別辦理如何仍望妥籌酌辦電復爲盼根源皓印

永昌師長憲鈞鑒第二大隊之第一中隊退伍目兵八十一名留隊目兵二十三名第
二中隊退伍目兵六十八名留隊目兵三十三名退伍兵均已出境謹陳紹騫謹稟冬
探投行轅李師長憲鈞鑒二營東日退伍約百五十餘人藉不分畛域協力維持頗安

靜並陳受業湘藻叩江印

省城軍都督府鈞鑒月密徐教練鴻恩所率之七聯第二大隊第三四兩中隊前自永康返永正該大隊第一二兩中隊由永開拔之際恐其合併難以防維因飭該教練率領取道順寧以分其勢並飭暫駐順城十日俟第一二兩隊到榆退伍後再調該兩中隊回榆退伍頃接張守漢稟密電稱榆軍習氣甚深徐教練不能管束請飭早日出發以免不虞並據徐教練電稱兩隊駐順人數太多請電飭右隊先行回榆各等語查一二兩隊到榆已電飭孫聯長速將該兩隊先退四分之三計將退畢自可令該兩隊全行回榆當經電飭該教練尅日率領由順開回以備退伍而免他虞惟兵驕難馭至於此極深切隱憂惟有節節爲防期以免其橫溢謹陳根源叩冬印

永昌師長鈞鑒第七聯第一大隊之第三中隊已於庚日退伍訖矣謹聞嘉壽叩佳印
永昌師長鈞鑒徐教練所率兩中隊本日午後一時抵榆無異狀謹聞嘉壽叩文印
師長鈞鑒第三大隊之第一中隊本日退伍訖矣徐教練所率兩中隊已定銑日退謹

聞文日同孫聯長所呈密電究應如何辦理乞迅密示嘉壽元叩印

大理繆中軍官覽徐教練所部兩中隊本日退伍事竣否該兩隊退伍之後共留目兵若干名並前退伍殘留者總共尙有若干名希速電復爲盼總司令部鈇印

大理孫聯長繆中軍官鑒漾電悉現在邊事緊要所請將第三大隊第一二兩中隊留伍各老兵於退伍後暫編爲一小隊帶同前往以資得力自可照准將來邊事平靖卽就近遣歸田里以免久戍之勞已轉電軍府查照矣根源敬印

永昌師長鈞鑒第三大隊第二中隊前本定皓日退伍嗣因該中隊目兵多無便服軍服繳後則無衣可着現要求暫駐營中各製便服一套製齊卽行出營查屬實情已將槍械軍裝等件如數收繳約三四日即可製竣出營別無異狀特此稟知第七聯子彈每日均清理繳局現已繳十分之六七矣楊趙兩中隊本日已移交清楚准明日移駐營中并聞嘉壽叩印

李師長鈞鑒楊趙兩中隊於本日午前十時移駐第七聯兵舍訖矣第一大隊之老兵

准明日退捌拾陸名餘係隨時添募之兵無退伍資格業與孫聯長商定俟老兵退後
卽陸續開除張提台本日已抵下關明日入城已約定官軍紳學商各界遵師長示一
體歡迎謹聞嘉壽叩馬印

永昌師長鈞鑒徐進已於本日正午十二時接事到差第二大隊留伍老兵一百零八
名准明日退伍出營謹聞嘉壽叩宥印

師長鈞鑒第二大隊老兵一百零八名已於本日退伍出營該大隊軍械軍裝亦已全
數繳交餉局訖第一大隊本日又退老兵五十二名查此項老兵非初次所募本無退
伍資格嗣因各中隊長要求該兵等在營兩年有餘從無過失請仍照退伍例辦已與
孫聯長會商從權照退伍辦理亦於本日一律退伍出營矣第一大隊軍械軍裝等件
亦飭徐大隊長陸續繳局特此稟知嘉壽叩感印

師長鈞鑒第一大隊留伍新老兵本日已一律分別斥退該大隊軍械軍裝亦全數繳
交餉局第三大隊之軍械軍裝除趙楊兩中隊撥用外餘亦繳交餉局統計全聯目兵

除第二大隊新兵六十名蒙准留伍外餘均全退無遺全聯軍械軍裝除趙楊兩中隊撥發外餘亦全繳無存退伍一事本日告竣嘉壽謹稟艷印

大理孫聯長覽頃奉軍都督府灰電開第七聯第一大隊長鍾湘藻調省升充衛戍司令部一等參謀官所遺大隊長差以西防調查員衛戍司令部二等參謀徐進接充希轉飭遵照等因希即轉飭遵照總司令部灰印

大理孫聯長覽頃奉軍府電以藏事方殷邊防緊要該聯長熟悉邊情調充麗維統領飭速啟程所遺第七聯長以繆嘉壽代理等因特電轉達遵照總司令部印

大理鍾大隊長覽頃奉省電升任衛戍參謀既喜長才可試復惜匡助無資本擬電省請留惟衛戍總司令官爲羅鎔軒總長兼任彼此同有師友之誼在省無啻在榆且西事勾當既畢源亦行將返省相聚之日視榆尤長小別無幾諸希勉力根源文印

永昌行營師長憲鈞鑒寒日奉聯長令遞奉軍府電以藻升充衛戍一等參謀並另奉吾師文電訓勉一切遵奉讀訖慚感交榮查參謀一差掌任各種計畫責重事繁爲兵

間要職非學問明達才識優長者斷難勝任知弟莫若師藻粗鄙之無識淺陋早邀洞鑒現在承乏大隊尙形竭蹶若遽膺機要運籌借箸無處可以措手惟有仰懇鴻慈速爲電省代陳下情另選賢能俾免濫竽之誚而貽師門之羞無任叩禱至現委之大隊長徐進聞其品學兼優才識並懋此次到榆必能有所整理應懇飭其早日到差俾得釋肩藉資休息數日如能給假回籍奉母尤吾師厚賜也合併陳明臨稟無任迫切之至受業鍾湘藻謹叩刪印

大理鍾大隊長鑒刪電悉吾弟任事熱忱勤明精幹實所共知雖學科稍有不足惟衛戍司令部範圍在保衛省治之安甯任務即注重於辦事非有幹才者不能勝任吾弟正可展其所長即羅總司令來電諄諄屬望亦在於此至軍事重要計畫大都屬參謀部非衛戍所有事也西事已平同人均將返省仍可共事一隅况時局多艱需才孔亟更非釋肩之日願勗嘉猷勿萌退志兄根源銑印

大理孫聯長覽李中隊長鍾瀚素稱勤幹此次率兵週歷麗永楚深資得力且約束兵

士甚有紀律方資依畀茲因省親懇請長假碍難照准惟來電稱該員在外日久情詞逼切不得不俯如所請以遂烏私著特別賞給旅費銀壹百元卽由餉局支領轉發可也總司令部敬印

大理孫聯長覽漾電悉郭昌明李鍾翰李傳統趙炳崑王治邦五員或因省親或因久病請給長假均卽照准希卽轉飭遵照通報查考總司令部敬印

永昌行營師長憲鈞鑒第二大隊一中隊長郭昌明第三大隊一中隊長李鍾翰四中隊司務長趙炳崑因省親修墓請給長假第二大隊二中隊長李傳統第三大隊小隊長王治邦因久病請給長假各等情前來查該員等均籍隸外省情詞迫切應否照准乞電示遵紹審嘉壽謹稟漾印

大理孫聯長繆中軍官鑒敬電悉中隊長馬海清明白勤慎兼能和輯回民既係學術欠缺應准予更調以當其才現將返榆卽俟到榆後酌予調用可也根源敬印

永昌師長鈞鑒頃聞孫聯長來晤云及第二大隊第四中隊長馬海清係榆城回民心

地光明辦事勤慎此次反正之始回民疑慮滋多得該中隊長多方解釋始帖然心服
尤得大體惟學術不足在新軍中決難勝任擬請改調國民軍相當之職既可取其所
長而於回民一方面亦隱有關係特請電稟師長鑒核等語合并轉呈是否有當乞核
奪示遵嘉壽謹叩敬印

大理孫聯長繆中軍官覽有電悉籌畫周詳佩甚所請各節均准照辦希由孫聯長轉
飭遵照總司令部有印

永昌師長憲鈞鑒第二大隊全隊自兵現已悉數退伍該大隊軍官佐或因省親或因
有病亦全體請假審等查其中有應懇准假者有應懇留用者不能不懇恩分別准留
中隊長蕭雲程小隊長王得勝狄孟賢朱雲龍楊世成李元勝吳培源楊焮堂樊得勝
司務長趙鳳朝周昶馬占高軍需長韓綺軍醫長蔣迎春司書生蔣先春李繩胡永年
楊德元林祖烈李舜臣等二十員懇即准假並懇給予舊歷二月分全薪以示優遇督
隊官何禮中隊長馬慶海小隊長趙棠蘇振邦郝景魁司務長蘇茂等六員深明大體

材堪造就請仍留用又第一大隊書記長趙錫焜通達諳練反正以來深資得力擬請調入總司令部以州縣記名遇缺即委以示獎勵第二大隊書記長李植心地明白熟習公務請卽調充第一大隊書記長可否之處伏候核示祇遵聯長紹騫中軍官嘉壽謹稟有印

省城軍都督府鈞鑒西防國民軍第八營管帶周連彪因病疊懇辭差自應照准所遺管帶一差遵卽於本日以第七聯第三大隊長陳松壽調充該大隊一切事件及退伍後所留官兵均併歸第七聯第一大隊長徐進接收除分別令知外謹陳乞飭部備案師長根源叩庚印

今查此次第七聯隊退伍目兵多係大理麗江兩府及蒙化廳所屬民籍該目兵等在營有年現在退伍回籍昔日之爲農爲工爲商者今歸仍理舊業殆不乏人其因入軍籍停歇本業現在回籍乏力經營或在伍日久執業日疏歸里以後暇逸自耽者恐亦所在多有當茲民國新造齊民均應各執一業况屬退伍之兵詎忍聽其惰廢爲此令

仰該

府廳
州縣

即便遵照將本屬退伍之兵共若干名現在回籍若干未歸若干仍理舊業者

若干失業遊蕩者若干督令警察及地方紳董原日保人切實調查限十日內開單呈

由該

府廳
州縣

彙報查考以便爲籌生計庶免一境之內惰農廢工徧地皆是貽地方之害重

有司之責本總司令實隱憂之萬勿延玩擱置是爲至要此令大理府及所屬各州縣
蒙化廳鶴麗劍三州縣

令查從前徵兵弊端迭出或按戶攤派或賄託免充或派合村捐錢供給應募之家屬
或自行出資倩請無賴以頂替甚至約甲從中訛詐舞弊營私因之軍隊教育潛蒙弊
害良可慨歎此次第七八聯退伍完竣徵募新兵經已規定僅就鄧川鶴慶劍川麗江
雲龍漾濞雲南浪穹永平等各州縣徵選雲南縣應徵二百名浪穹永平雲龍鄧川四
州縣各應徵壹百名漾濞應徵六十名鶴慶劍川麗江各應徵八十名自應妥定辦法

俾免再蹈積弊爲此令仰該州縣即便遵照發去選格出示曉諭城鄉人民知悉如家有

子弟實合選格暨確係土著并非退伍及曾經充當營兵者准其由該父兄出具志願

書再由該處紳董出具保結遞到該州縣自治公所由公所加結彙送該州縣照所定額數

挑選格外多送二十名加結造冊呈送本司令部以備復選編配入伍其入選而未成

軍以前每名每日准給小口糧肆分限文到十日內即行選齊送部毋得延誤并由該

州縣詳爲查訪若再有前項情弊應即查實稟請重究不貸切切此令選格列後計開一

年齡以十八歲至二十五歲以下者爲合格二智識以粗識文字者爲合格三身體以

體質強健五官端正而無暗疾者爲合格四體力以能挽六十斤者爲合格五目力以

不近視者爲合格六耳力以不重聽者爲合格七性質以誠樸耐勞確無嗜好及身家

清白者爲合格八曾經在陸防營充過目兵者不錄九本係外籍而來該州縣屬入贅

者不錄以上八九兩條該官紳等務須確切調查不得徇情隱諱濫選充數倘經查出

即爲該官紳等是咎右令永平縣知縣李治浪穹縣知縣張映寶鄧川州知州何誠雲

南縣知縣路承熙漾濞縣杜樹鶴慶州王人驥劍川州張錫年麗江府姚春魁雲龍州知州蘇紹章

省城軍都督府鈞鑒第八聯第一大隊遵前電改編爲第七聯第二大隊已於篠日飭該大隊長方炳率隊移入第七聯並飭切實淘汰認真整頓教育諸務謹陳乞飭部備案師長根源叩巧印

省城軍都督府鈞鑒第八聯第二大隊第三中隊目兵已一律飭其退伍老兵每名發給恩餉銀伍兩新兵每名發給恩餉銀叁兩官長送入講武堂肄業退伍時源親蒞該隊集合演說曉以大義軍士咸歡欣鼓舞謹陳根源叩巧印

省城軍都督府鈞鑒榆事肅清已飭劉聯長祖武率領鄧礮隊約五十餘人邢機關槍隊約三十餘人趙中隊約一百二十餘人騎兵小隊九人共約二百人開拔旋省趙中隊於馬日出發劉聯長率礮機騎各隊於養日出發至祿豐會合趙中隊本擬在榆飭其退伍據劉聯長稱該隊目兵多籍隸昆明請抵省後再爲退伍至各隊官兵均紀律

嚴明品行方正各種子彈悉數留榆俟各隊抵省安置完備後再行派員解運到省謹先電陳根源叩巧印

楚雄黃諮謀官邢中隊長同覽黃諮謀陽電悉該中隊本日抵楚經集合犒勞辦理甚是惟查該中隊隨同出省至榆至騰往返跋涉備嘗辛苦此次事定旋榆飭令率隊返省原以各日兵在伍日久俾得於到省後陳情予假或歸里省親或回家完娶各遂室家之思日前藏亂猖熾邊警頻聞因飭率隊蕩回以備緩急惟刻接麗江中甸各處來電藏事雖急滇邊尙稱安靖現飭孫統領等加意防範布置漸臻周密該隊目兵等久戍於外晨昏之念鄉井之情自必異常肫切本師長每一念及深切咎心尤宜曲加體恤以慰勤勞應卽由該諮謀會同該中隊長加意撫慰並逐一詢其志願凡各日兵中有擬回籍省親完娶者卽准給假兩個月回籍並按名發給六月分全月餉銀以示優遇其自願留伍目兵卽由該隊官長帶同護解槍彈來榆另由榆募足全隊人數以資調遣該中隊應需餉項銀兩卽由兵站餘款支給彙報核銷希卽查照會同妥爲辦理

電覆查考師司令部陽印

楚雄黃諮謀官邢中隊長覽真電悉該隊目兵請假完娶者九人均照准並發給六月全餉及五半月餉外再給退伍恩餉伍兩以示體恤退伍執照俟該中隊長抵榆查明籍貫填妥交該管地方官轉發餘仍照定期開拔來榆可也總司令文印

省城軍都督府鈞鑒據代理第七聯長繆嘉壽呈稱嘉壽奉委之初力辭未允祇以退伍之際群情皇懼不敢避難嗣全聯目兵退伍告竣各隊官長甄汰已畢復經呈請交卸又蒙責成辦理徵募編配事宜遵即派員分往徵募現在應補新兵陸續募齊並經從嚴選擇分配入伍本聯編配刻日就理惟編配既定亟應注重訓練以期教育完全嘉壽學術疎陋斷難久冒重任應懇轉請軍府迅委接替俾得早日交卸以勵進行而免貽誤等情查該員迭次堅辭均以該聯舊兵退伍新兵編配一切需人辦理未予遽允茲復呈請委員接替辭尤懇切謹此轉呈伏乞核示飭遵師長根源叩馬印

大理李師長鑒馬電悉繆聯長嘉壽懇請辭職應即照准着即回省另候委用第七聯

長委李伯庚前往接替都督府敬印